

清

史

稿

清史稿

列傳四十五

希福

姓 旗 安 世 職 官 參 謀 總 領 林 納

鄂克遜

沙 奔 奕 禮 特 禮

偏圖

瑚里布

達 理 魯

額楚

額 成 順

額斯泰

布 野 庫 塔 額 岱 庫

瓦岱

桑 格 伊 巴 罕

沃申

武 羅 萬

瑚圖

瑪 哈 達

傑殷

烏 傑 那

瓦爾喀

希福他塔喇氏滿洲正紅旗人世居安楚褚庫路祖羅屯國初以八百戶來歸編牛象父哈甯阿官巴牙喇甲喇章京從征錦州松山入山海關遂李自成至慶都授牛象章京世職希福初任二等侍衛襲世職遇恩詔進一等阿達哈哈番兼拖沙喇哈番累遷正黃旗蒙古副都統康熙十三年吳三桂反從大將軍順承郡王勒爾錦赴湖廣陝西提督王輔臣以寧羌叛分據平涼秦州命希福移師守興安漢中十四年大將軍貝勒洞鄂進攻秦州希福攻克東西二關十

五年調守隴州十六年邊前鋒統領十七年命赴湖南駐茶陵十八年攻衡州夜半薄城下奪門入賊燒營遁城復擢正紅旗滿洲都統時耿精忠將馬承蔭以南寧降詔希福率所部赴廣西佐鎮南將軍莽依圖規雲南十九年承蔭復叛戰陶登大敗之莽依圖卒於軍朝命賚塔爲征南大將軍希福將莽依圖所部以從至西隆破石門坎復安籠所攻黃草壩希福屢力戰既至曲靖復馬龍諸城遣碩塔等下嵩明州遂會大軍圍省城希福率前鋒衝擊賊大潰其黨馬寶胡國柱自蜀還救希福與珠滿桑額迎戰烏木山大破之寶奔姚安部卒潰尋降國柱奔雲龍州希福追至永昌截守潞江諸要隘國柱自度不能脫縊死其別將王緒李匡自焚死二十一年擢西安將軍部議追論希福從征長沙戰失利當奪官削世職上念希福戰功多命輕之二十七年調正紅旗蒙古都統二十九年噶爾丹寇邊上命裕親王福全出師討之以希福參贊軍務破賊烏闌布通三十一年授建威將軍統師駐右衛三十三年噶爾丹內犯將侵根敦戴青詔希福亟赴圖拉備守禦希福疏調大同總兵康調元率三千人偕往並

請發察哈爾兵上責其疑阻敕還駐右衛部勅希福不收八旗送馬糜餉免官
三十八年卒珠滿瓜爾佳氏隸滿洲正白旗先世居烏拉祖多和倫來歸次子
額赫瑪瑚任侍衛攻鄭成功厦門陣沒贈拖沙喇哈番無子珠滿其兄子也襲
世職署參領耿精忠叛使其黨犯南康珠滿從將軍尼雅翰擊敗之吉安既平
又從莽依圖軍征廣東入韶州馬寶等來犯珠滿居右翼奮戰大破賊寶潰圍
出進取廣西破吳世琮解南甯圍陶登之捷并敗世璠將范齊韓詹仰等援兵
從希福征雲南石門坎黃草壩諸役戰常陷堅圍省城斬世璠將胡國柄於烏
木山師還管拜他喇布勒哈番兼拖沙喇哈番累遷護軍參領三十六年出爲
荊州副都統三十九年被命討川蠻駐守鴉隴江四十一年還本官會鎮鎮苗
亂命尙書錫勒達等統師撫勦以珠滿諳兵事敕共籌戰守撫降三百一寨唯
天星寨猶負岫師分四路入珠滿爲策應攻克葫蘆寨餘悉平擢江南將軍四
十六年卒進世職三等阿達哈哈番瑪奇納喇氏滿洲鎮白旗人其先哈達萬
汗之族初授顯親王護衛累遷鎮白旗滿洲都統列議政大臣上念廣西將士

勞苦日久宜番休命與都統趙璉副都統宏世祿祖植椿率師往并命參贊軍務次柳州降僞將三十餘人賚塔取雲貴上趣瑪奇進兵安籠所黃草壩諸役並有功進軍曲靖迭克馬龍州易龍所楊林城世璠軍壁渾水塘與嵩明遙應瑪奇分遣兵趨嵩明乘不備克其東門賊啟西門遁迺會貝子彰泰軍入省城屯歸化寺世璠使其將胡國柄等出戰陣斬之遂合圍與勅貝等奪城西北銀錠山賊礮彈雨下瑪奇挺立當其衝督兵掘濠築壘成俯瞰城內縱礮賊不支內亂世璠死與穆占入城撫民授鎮安將軍駐防雲南二十三年坐才力不及當免上命撤雲南駐防兵瑪奇率以還京三十五年卒子常賚自有傳額赫訥納喇氏滿洲鎮藍旗人初任王府護衛遷巴牙喇甲喇章京從征雲南及平棲霞土寇有功擢鎮藍旗蒙古副都統駐防兗州耿精忠叛分兵犯江西韶參贊簡親王喇布軍務馬雄擾廣東命倍道往援未至而尙之信謀亂將犯贛州額赫訥退守南贛連破寇寨二十餘會叛將嚴自明犯南康圍信豐又擊之固鎮鋪圍解命參贊莽依圖軍務赴韶州馬寶等壁城東山與額楚擊敗之旋奉

莽依圖檄赴梧州佐傅宏烈聞祖澤清叛據高州亟還師次電白賊殊死守額赫訥破之高州平授護軍統領從莽依圖進剿柳州與勒貝希福分路擊敵敗之二十年克安寵所略定曲靖羅平師既克雲南凱旋調前鋒統領擢鑲藍旗滿洲都統列議政大臣噶爾丹犯邊命屯歸化城尋召還以老乞休卒宏世祿瓜爾佳氏滿洲鑲紅旗人世居瓦爾喀祖噶錫屯歸太祖授世管牛彘額真順治間宏世祿嗣職邊巴牙喇甲喇章京從征雲南入緬甸敍功予世職拖沙喇哈番康熙十二年擢鑲紅旗蒙古副都統十四年大將軍信郡王鄂札討察哈爾布爾尼宏世祿參贊軍務師至達祿薄敵壘布爾尼設伏山谷間以三千餘人出拒宏世祿將右翼進戰伏起師有備盡殲之布爾尼悉衆發火器力戰宏世祿等縱兵分擊大破之布爾尼收餘衆屯山岡宏世祿督兵環射分道掩殺布爾尼乃遁走進世職三等阿達哈哈番十九年命與瑪奇等益賚塔兵攻石門坎賚塔勒貝等爲前鋒宏世祿等繼進破賊奪隘入攻黃草壩宏世祿當頭隊復力戰破隘師還二十三年以老乞休二十七年卒彭庫亦瓜爾佳氏滿

洲鑲白旗人父多克索哩事太宗從伐明攻南皮先登賜號巴圖魯世職牛錄章京順治間累進二等甲喇章京卒彰庫襲自驍騎校署參領從將軍希爾根討耿精忠徇撫州破精忠將易明戰建昌陳斬楊益茂等又擊破邵連登長興山李茂珠等建昌鎮鼓山從勒貝攻柳州破世璠將范齊韓詹仰等從賚塔下雲南克石門坎黃草壩皆在行又從希福逐世璠將馬寶巴養元戰於烏木山大破之寶等降師還進世職一等阿達哈哈番兼拖沙喇哈番授護軍參領累遷至鑲黃旗滿洲副都統致仕卒子海寶康熙三十三年進士官翰林院檢討

變職

鄂克遜富察氏滿洲鑲黃旗人父鄂通武事世祖有戰功授拜他喇布勒哈番鄂克遜襲職康熙十二年吳三桂反京師聞變有楊起隆者詐稱朱三太子私改元廣德號其徒爲中興官兵裂布裹首以白披身以赤謀作亂其徒黃吉陳益等三十餘人衆正黃旗周公直家公直承恩伯全斌子也家鼓樓西街公直出詣都統祖永烈告變起隆等遽舉火鄂克遜行過鼓樓見火升屋望之賊皆

披甲露刃遂奔告兵部尙書明珠都統圖海永烈與副都統覺羅吉哈禮率兵圍公道家賊益縱火流矢如雨鄂克遜先入斬十餘人禽益吉悉誅之獨起隆遁去後七年圖海駐軍鳳翔捕得起隆檻送京師誅之十二年春以參領銜從定南將軍希爾根赴江西至南昌寇陷龍泉石灰澳者縣要隘也南曰山都澳北曰河塘澳寇阻險築壘相犄角鄂克遜奪其隘口破南北諸壘寇遁躡擊至曹林拔十餘寨遂復龍泉敵來犯復擊破之十五年從簡親王喇布及希爾根攻吉安敵陳於城北以火器戰鄂克遜劇賊壘逐賊賊墮濠死者甚衆三桂將馬寶與韓大任以數萬人來援戰於螺子山我師敗績鄂克遜被數創猶力戰馬踏鄂克遜墮躍而起手刃數人復奪馬入陳收戰士尸奔而殿十七年大任自萬安走福建鄂克遜與額楚分道逐賊敗賊汀州老虎洞焚其壘殺賊六千餘復從穆占徇湖南時拉塞薩克察自安仁赴永興被困穆占令鄂克遜送米及火藥濟之賊拒阻擊却之乃得達十八年與三桂將郭應輔吳國貴戰於永州多所俘馘十九年師下貴州戰於新田衛復進逐賊鎮遠克偏橋興隆二衛

穆占令鄂克遜襲取重安浮橋師得濟二十年師下雲南圍省城破象陳鄂克遜奪歸化寺東西二學師還授江寧駐防佐領再遷江寧副都統四十六年上南巡鄂克遜迎謁陳戰績擢江寧將軍進三等阿達哈哈番五十七年以老乞休雍正七年卒年八十八諡武襄莽奕祿富察氏滿洲正白旗人曾祖阿布岱自葉赫歸太宗授牛羊章京世職莽奕祿襲累晉二等阿達哈哈番從師征廣東敗李定國於新會進一等康熙初元授護軍參領三桂反詔署統領從征湖廣以功擢鎮白旗蒙古副都統十九年從穆占征貴州時世璠據貴陽其將韓天福據新添衛莽奕祿與諸軍擊却之復龍里薄貴陽城世璠遁遂克之二十年進軍平遠賊據西南山拒戰又與副都統花色等擊敗其衆城復旋下黔西大定諸城遂入雲南會賚塔軍於曲靖進圍省城調滿洲副都統參賚賚塔軍務雲南平還授護軍統領管佐領擢都統三十年出爲荊州將軍四十二年謝病歸尋卒設敏肅雍正時命改入正白旗沙納哈伊爾根覺羅氏滿洲正黃旗人順治六年從征大同克左衛先登賜號巴圖魯授拜他喇布勒哈番兼拖沙

喇哈番旋署甲喇額真從將軍伊爾德下浙江克舟山進三等阿達哈哈番移師福建討鄭成功率師爲前鋒以舟進俄舍舟登陸戰失利面及項中三矢師退吏議奪賜號世職以受創重免籍沒鞭責頃之還拜他喇布勒哈番授西安駐防佐領已命還京授參領康熙十三年精忠叛出師江西敗易明於撫州賊自建昌入奉希爾根檄率前鋒兵百會兩藍旗兵擊卻之叛將楊富弟楊三與李茂著以萬餘人掠撫州與護軍統領瓦岱進攻大捷三茂著中箭墮水死從岳樂進兵瑞州寇萬五千人自上高扼會浦與桑額疾擊之克上高阮國棟據新昌北山復與諸將會擊斬四千餘級新昌亦復進規萍鄉三桂將夏國相等以一萬三千人據來龍山結寨十二師環攻之賊敗潰沙納哈截殺之脫者僅四百十八年兵進次湘潭賊遁走邊正黃旗蒙古副都統前鋒統領其秋國相屯武岡雙井寨使馬寶等以二萬四千人拒戰沙納哈將三百人進擊賊披靡遂北至楓木嶺二十年師至盤江西坡擊敗世璠將線絨遂入雲南世璠以象陣拒師沙納哈大敗其衆追迫城下斬其將胡國柄等九人雲南平摺正黃旗

蒙古都統列議政大臣二十六年謝病歸尋卒卹如制

偏圖李氏漢軍正白旗人隸內務府康熙十三年以奉宸院僉長從軍陝西授都司銜旋授督標游擊十四年土寇李長骸以千餘人攻淳化三水掠三原偏圖與游擊繳應善將六百人自涇陽逐賊至紅水溝俘四十餘獲旗械驛馬以歸又率綠旗兵從將軍阿密達出瓦雲驛與副都統鄂克濟哈率滿洲兵共趨涇州賊據隘數戰破之進薄城賊出拒擊斬三百餘級遂克之斬王輔臣將衛民譽又從護軍統領舒淑攻靈臺破輔臣將馬瑞軒拔陶家堡斬百餘級又與鄂克濟哈略慶陽招降二十餘寨入寧州破輔臣將魏虎山馮嘉德等還軍涇州又破賊鎮原從大將軍貝勒洞鄂攻輔臣平涼賊築壘高阜將二百五十人與護軍統領阿哈多等仰攻破之十五年援商州克山陽破輔臣將李茂榮於寬平里斬百餘級復援三原戰西陽鎮遂賊至鳳凰山出陷賊難民百餘尋從大將軍圖海攻平涼屯虎山墩斷糧道輔臣降十六年授督標副將十七年從征興安賊據嶺掘濠樹柵偏圖自窰兒溝出嶺後毀壘逐賊至香泉十八年攻

破梁河關克興安及漢陰石泉諸縣十九年命從將軍趙良棟南征二十年命增置雲南隨征總兵以授偏圖吳世璠將胡國柱以二萬餘人屯馬湖拒守良棟檄偏圖堅守雅州徇榮經斬百二十餘級從良棟軍克關山關下黎州奪大渡河隘口逐賊火場壩深入山谷中降世璠將蔡國明戴聖明於登明楊泗等復越嶺建昌渡金沙江破石虎關遂攻會城奪玉皇閣及土橋東寺西市三市街城旋下二十一年授永順總兵敘功加左都督三十年朝京師擢雲南提督四十五年復朝京師賜孔雀翎五十年遷鎮白旗漢軍都統五十五年卒賜祭葬諡襄敏子世職拖沙喇哈番

瑚里布赫舍里氏滿洲正紅旗人世居和穆多哈連父吳巴海歸太祖授牛錄額真瑚里布襲天聰間擢一等侍衛噶布什賢章京事太宗屢從征伐順治元年英親王阿濟格討李自成瑚里布率正紅旗前鋒兵從二年師次綏德賊乘我未列陳掠我馬數十瑚里布追及之山巔擊賊潰以所掠馬歸自成走湖廣師從之克安陸瑚里布破賊得其戰艦遂自成至九宮山五戰皆勝以功授世

職拖沙喇哈番三年肅親王豪格討張獻忠師將至西充令瑚里布與參領席卜臣率前鋒四十人持檄先驅遇賊騎突前衝擊斬三十餘級俘二人薄獻忠壘斬其執纛者師繼進與戰遂殲獻忠瑚里布復與都統準塔下遊義戰壁山破賊六年從征湖廣攻湘潭徇衡州皆有俘馘以功進世職三等阿思哈哈番累擢正紅旗滿洲副都統右翼前鋒統領十五年從信郡王多尼南征十六年師克雲南明桂王走緬甸與左翼前鋒統領白爾赫圖率兵趨永昌渡潞江戰磨盤山克騰越窮追至南甸師還追論磨盤山戰時都統沙里布戰死瑚里布弗及援功不敘康熙十二年聖祖加恩諸舊將瑚里布加太子少師吳三桂反授都統赫葉安西將軍改瑚里布護軍統領爲之副率禁旅自西安進十三年趣瑚里布與前鋒統領穆占馳援四川師次漢中寇屯陽平關攻克之迭破七盤朝天二關進攻保寧三桂將吳之茂拒守與相持上命大將軍貝勒洞鄂西征瑚里布參贊軍務王輔臣叛應三桂命瑚里布引兵自漢中還駐西安尋又命瑚里布從洞鄂攻輔臣克秦州進圍平涼久不下十五年以大學士圖海代

洞鄂爲大將軍瑚里布罷參贊留軍聽調遣十六年卒於軍達理善那木都魯氏滿洲正黃旗人其先世岳蘇納與綏芬路長明安圖巴顏同族歸太祖達理善其四世孫也崇德間以閒散隸驍騎營從征明攻濟南樹雲梯以登達理善爲第三人克其城賜號巴圖魯予世職三等甲喇章京復從征明圍錦州戰松山杏山間屢破敵順治三年從梅勒額眞珠瑪喇和托等駐防杭州擊敗明將方國安屢戰皆捷五年從討叛將金聲桓復南昌累進世職一等阿達哈哈番兼拖沙喇哈番授甲喇額眞十五年從征雲南攻元江克之得明桂王將高應鳳進世職三等阿思哈尼哈番康熙二年以老乞休十三年王輔臣叛請自効命署本旗副都統率師赴西安十四年次隴州仙逸關輔臣屯平涼遣其將高鼎蔡元以四千人迎戰達理善與前鋒統領穆占等共擊之鼎元敗走克關山關師自清水進奪渭河橋次秦州城寇出戰達理善縱兵夾擊寇敗入城分兵克東關叛將吳之茂以萬人援平涼逼秦州立寨城寇八千餘出應犯我師達理善已病猶督兵力戰大破賊卒賜祭葬諡武毅事定兵部敕功上諭曰達

理善巴圖魯以老乞休復請從軍盡心效力卒於行間復加拖沙喇哈番合爲
二等阿思哈尼哈番

額楚烏扎拉氏滿洲鎮黃旗人先世居薩哈勒察順治初從內大臣和洛輝出
師駐防西安降將劉洪起以西平叛樹雲梯攻城護軍昂海先登額楚繼之遂
克其城授牛彖額真迭進三等阿達哈哈番從軍貴州還適鄭成功犯江寧遂
自荊州馳救大破成功進二等再遷江寧副都統康熙七年遷將軍精忠之叛
也徽州所屬多附賊移師規績溪破之克徽州賊據休寧新嶺分兵夾擊長驅
復婺源詔進征饒州攻樂平薄東門賊出竄追襲之俘斬過半進攻鄱陽遂定
饒州叛將陳九傑遁入鄱陽湖毀其舟十餘次萬年至石頭街渡口與賊夾水
而軍額楚自出挑戰而潛使騎兵濟上游繞賊後夾擊俘九傑誅之萬年復並
克安仁弋陽上復命贊簡親王喇布軍南昌會三桂遣高天傑陷吉安與將
軍哈勒哈齊攻之克外郭馬寶韓大任等來援額楚迎戰於螺子山我師敗績
寶聞長沙被圍乃引去坐失機能官留世職仍領江甯兵赴廣東寶等復犯詔

州師次蓮花山賊逼管城兵出應戰破賊遂與勅貝守韶州尋命與莽依圖合軍進叛將祖澤清復以高州應賊詔趣額楚自肇慶兼程進至藤縣遇大疫士卒馬多死疏請增遣備禦未至而寇集城陷與勅貝進解南寧圍還江寧十九年卒穆成額那木都魯氏滿洲鑲紅旗人父富喀禪西安將軍有勳勞語在康古里傳授三等精奇尼哈番穆成額襲職精忠叛命署副都統從征南將軍希爾根下江西分守南昌三桂自長沙遣將犯袁州與總兵趙應奎赴援敗賊西村規萬載斬其渠邱以祥城復遂克安福精忠將劉進忠搆鄭錦擾瀕海郡邑上先後命尼雅翰舒恕率兵赴廣東以穆成額參贊軍務克始興梟通賊守備李光明尚之信以韶州南雄叛退保南安贛州克萬安南康頻有功上命舒恕守贛州而以莽依圖代其任穆成額參贊如故廣東定從莽依圖下粵西三桂遣將分犯潯州梧州桂林平樂與額楚勅貝傳宏烈并力討之次鬱林戰失利還守藤縣尋復陷坐免官籍沒未幾卒

額斯泰富察氏滿洲鑲白旗人大學士額色赫弟也初任一等待衛康熙三年

擢副都統九年授護軍參領吳三桂反命順承郡王勒爾錦帥師討之以額斯泰參贊軍務三桂兵自貴州出湖南南境皆陷韶與護軍統領伊爾都齊簡銳先發十三年二月師次荊州常德長沙皆陷三桂將劉之復陶繼智率萬餘人犯宜昌夾江而壘額斯泰自荊州赴援與總兵徐治都率舟師橫江截擊戰而接賊潛以三百人擾我師後我師分擊敗之得賊舟三賊敗走師進次岳州三桂時屯澧州其將吳應麒廖進忠柯鐸高起隆據岳州馬寶胡國柱率二萬人會於澧州水陸岔集設鹿角阻我騎兵額斯泰與貝勒察尼等議令前鋒先奪山岡扼賊吭繼乃分路截擊奪據城陵磯及七里橋俾首尾不相顧至期間貝勒營吹角額斯泰率戰艦進衆乘之賊大潰是歲冬命參贊貝勒尙善軍務規岳州與賊相持久十五年二月詔趣尙善進兵尙善乃令額斯泰督所部水陸諸軍以進賊舟列陣洞庭貫以鐵鑊額斯泰率銳卒衝其北使副都統路什擊其南戰甫交額斯泰麾纛進礮矢雨岔衛卒死者五人額斯泰不爲動進如前手刃數十人遂克君山獲賊舟五十餘詔嘉之十六年卒於軍師旋追論征岳

州遲留不進坐籍家產上宥之額斯泰偉幹有雅量郵軍愛民諳輅略嘗圖滇楚隕塞懸壁諦視既寢疾猶強起視事卒日軍民爲位哭哀動郊野孫傳鼎自有傳布舒庫吳魯氏滿洲正黃旗人父納爾泰官牛象額眞從征大同叛將姜瓖率子噶爾琿納什庫力戰陣亡布舒庫其長子也以巴牙喇壯達從征江西雲南戰常陷堅授拜他喇布勒哈番康熙初授參領撫正黃旗蒙古副都統列議政大臣韓大任據吉安上命參贊簡親王喇布軍務次永豐大任兵至與提督趙賴同擊之賊退守山寨布舒庫緩師誘之弗應相持月餘大任引去追斬千餘級大任走福建又與哈克三追剿連破之老虎洞鞍子嶺賊勢以蹙大任降還征湖南互詳哈克三傳賊犯永興穆占令守河岸賊不能進遂從穆占取耒陽進規常甯與塔勒岱數敗賊逐北翟里橋去永州四十里又從穆占攻城賊大潰與簡親王喇布會師武岡十九年授正黃旗滿洲副都統擊敗馬承廕克雜容承廕復降旋卒設剛壯塔勒岱博和里氏滿洲鑲白旗人初授噶布什賢壯達康熙初從征緬甸授前鋒待衛三桂叛從軍從穆占逐賊野狐嶺賊隱

深林中出步騎誘戰發其伏殲之克陽平關進次保甯蟠龍山師敗引還兩遇賊擊之敗去予拖沙喇哈番從討王輔臣戰隴州進圍秦州克之遂趨平涼屢捷十五年命從穆占移師湖南駐攸縣擊敗三桂將王國佐又敗黃士彪裘萬寶於鄆縣桂陽州敗吳國貴吳應麒於永州沅州凱旋授護軍參領擢鎮白旗蒙古都統進拜他喇布勒哈番兼拖沙喇哈番二十五年卒諡勇壯

瓦岱鈕祜祿氏滿洲鎮黃旗人額亦都孫也父敖德事太祖分額亦都舊轄人戶益以新附瑚爾哈部衆授敖德世管牛彘事屢從征有功授二等阿達哈哈番瓦岱其第三子也初任侍衛署巴牙喇甲喇章京從征雲南湖廣有功即眞康熙十三年耿精忠叛命署護軍統領從安親王岳樂援江西所至爲軍鋒次撫州戰鍾家嶺被巨創寇夜襲營仍力戰卻之並擊敗精忠將易明等又戰瑞州北山撫定東鄉移師徇建昌精忠將邵連登擁衆可八萬因山爲壘負險抗拒瓦岱與將軍希爾根分陣山下鳴角仰攻多所斬獲連登中矢餘潰復絕其歸路得賊舟六十餘遂下建昌乘勝克新城十五年復萍鄉進規長沙仍爲軍

鋒戰南橋齊家喇皆捷十八年克長沙以次下衡州寶慶並殲賊於武岡克其城渡紫陽河賊分據渡口瓦岱俟諸軍進戰引兵襲其後夾擊之賊大敗湖南平授護軍統領予世職拖沙喇哈番二十一年授江甯將軍二十三年車駕南巡嘉其居官廉賚御用袍并白金千二十四年召授鑲黃旗滿洲都統以博濟代之諭曰將軍副都統與地方官多不相能唯瓦岱克諸衆志爾富效之既至京任議政大臣二十七年湖廣裁兵夏逢龍倡亂命爲振武將軍往討之師至黃州逢龍所署置總兵趙得等迎降胡約謙等復獻武昌漢陽二城諸生宜畏生執逢龍以獻磔之並誅其黨與班師三十年詔授定北將軍率師赴圖拉追擊噶爾丹至克魯倫河三十一年命偕都統班達爾沙督理達勒鄂莫劄爾鄂莫屯田坐督耕不勤免官削雲騎尉尋卒桑格喜塔臘氏滿洲正白旗人庫禮子桑格以三等侍衛襲世職一等阿達哈哈番兼拖沙喇哈番善射擢一等侍衛康熙十五年授護軍統領從希爾根赴江西上諭以江西爲粵東咽喉江浙唇齒兵民持兩端當協同將軍領重兵進剿至則攻易明於撫州援賊自建昌

至倚城結壘合城寇拒戰桑格夷其壘明通州復明復來犯再敗之希爾根移師入城桑格出至碣石遇賊戰大捷連克上高新昌東鄉諸縣擊斬連登明通遂下建昌三桂將夏國相據萍鄉桑格會諸軍並進戰來龍山連破十二寨國相奔長沙康熙十八年克長沙御製詩寵異之有百戰威名早已揚句湖南上游惟武岡楓木嶺與辰州辰龍關皆天險爲入貴州要道三桂將吳國貴馬寶據武岡桑格與伊巴罕督兵攻之屢戰三晝夜國貴中砲死餘潰走遂克楓木嶺二十年以怠職罷官三十五年上親征噶爾丹詔署護軍統領師至魯倫河請追擊逸寇與平北將軍馬思喀進次烏蘭西路噶爾丹已敗收集降衆護送至張家口還京復護軍統領原品三十八年卒伊巴罕格濟勒氏滿洲正白旗人世居雅蘭其世父舒珠從征黑龍江有功授拖沙喇哈番無子伊巴罕襲初任三等侍衛改刑部郎中兼佐領累進二等阿達哈哈番嗣以護軍參領援江西擊走建昌賊及撫州援寇復新昌萍鄉楓木嶺之捷功最擢前鋒統領出爲盛京將軍康熙二十四年徵還復授前鋒統領二十五年追錄前功進世

職一等兼拖沙喇哈番尋卒

沃申鈕祜祿氏滿洲正紅旗人崇德時以噶布什賢兵從伐明錦州克松山順治元年從入關平保定進征山陝授拜他喇布勒哈番賜號巴圖魯平舟山有功加拖沙喇哈番累遷杭州副都統康熙十三年耿精忠叛浙東告警與總督李之芳赴衢州禦之尋徙守金華精忠將閩標自溫州來犯輒敗走又遣將焚浦江寇壘遂會貝子傅喇塔取台州道義烏遇精忠將趙明卿擊敗之十四年精忠將林冲等據仙居師三路入戰白水洋沃申縱兵張兩翼合營總薩木哈將左侍衛卦塔將右戰移時賊堅持不退沃申直前擊之連破二壘太平賊聞我師至就叛將曾養性乞兵以守時夜將半沃申三面梯攻缺其西而隱卒城外以待其逸黎明賊果啟西門遁伏起大潰師入仙居寇水陸扼險守沃申洞知有路通黃巖可襲其後伐木鑿石開道以濟師夜達黃巖賊大驚遣其黨吳長春扼半山嶺沃申身先士卒大破之進梁蓬隘口又大敗其衆養性奔福建十五年搆瑞安石塘賊分路入寇與副都統吉勒塔布先後擊退之其夏傅喇

塔被命征福建沃申從浦城爲四達要衝入福建捷徑也精忠將連登雲以二萬餘衆守隘沃申攻奪山寨武穆篤等乘霧直搗其巢復雲和精忠降沃申守延平亡何鄭錦勢益熾使其將吳淑取邵武薄延平頓木城新屯渡口別遣將潛撥浦塘隘口沃申率師破之乘勢渡河攻木城賊潰走遇其將楊德來援又敗之小河岸斬萬餘人邵武汀州相繼復秦甯建甯甯化長汀清流歸化連城諸縣以次皆降其將朱甯遁入海據石井寨十六年師分三路入沃申進自東路克清寺十七年寇萬餘人逼漳州其將劉國軒壁對河爲犄角城兵寡沃申以千餘人赴援瑚圖分道亦至大破之賊退據長泰謀犯南靖頓蜈蚣山沃申與瑚圖併力迎擊自辰至未賊大潰棄寨走克長泰賊退據江東橋截漳泉路沃申與浙江提督石調聲力戰攻橋東岸自長泰深入奮擊之賊遁走江道乃通十八年錦將林盛據東石其地近泉州爲金門廈門屏蔽三面皆海寇嬰城固守沃申精選前鋒架雲梯乘潮落亟進親薄壕指麾遂拔東石十九年錦將林深與我水師相拒別遣將扼大定小定梗我舟行道會泉州無舟沃申自陸

路取大定奪其中寨追至小定賊遁燔其巢適海澄已下乘勝渡海取尾高溪與漳州兵夾攻寇屯金廈者皆竄出大洋師還沃申留守泉州初江山之陷也積骸盈野議者頗咎之守金華奉檄取溫州赴事又綏守台州時小梁山寇勢盛未能擊廷臣追論其罪坐免沃申在行間久大小凡九十餘戰身被創二十餘處一時稱驍將三十年卒武穆篤富察氏滿洲鎮黃旗人初任巴牙喇甲喇章京從伐明桂王自貴州入雲南擊敗其將李成蛟於涼水井李定國於雙河口進至盧噶定國列象陣拒戰大敗之追至磨盤山又大捷授拖沙喇哈番又剿山東土寇于七有功授前鋒參領精忠叛從將軍傅拉塔率師自浙江下福建次台州賊壁黃瑞山謀犯天台其地當江北爲水陸咽喉武穆篤與吉爾塔布塞白理悉力攻克之師至涼篷隘口殺伏賊幾半賊夜遁武穆篤追擊於黃土嶺賊潰退黃巖師圍城曾養性遁走城復師至上塘嶺養性擁衆三萬拒戰武穆篤統前鋒衝擊大敗之身被數創獲甲械無算太平樂清青田三縣大荆磐石二衛相繼收復石塘嶺之役功最康熙十七年創發卒於軍喪還遣侍衛

內大臣奠茶酒命賜卹視前鋒統領進拜他喇布勒哈番謚褒壯

瑚圖洪鄂氏滿洲鎮白旗人以巴牙喇壯達從征湖廣福建屢有功康熙二年授江甯協領八年擢副都統十三年耿精忠叛命與副都統瑪哈達率所部赴杭州參贊平南將軍賚塔軍務精忠將馬九玉遣別將胡錦等犯衢州與副將王廷梅等擊敗之復破賊大清源焦園紅橋諸處十四年九玉屯衢州西南夜渡水襲我軍與廷梅往擊之敗之杭埠九玉復遣別將李廷桂軍元口村設木城絕我糧餉並據東西山爲犄角瑚圖分兵擊之燔其木城賊敗走十五年覆其兵大溪灘江山復九玉奔常山瑚圖進圍之遁去逐至江西玉山界克常山進拔浦城及精忠降隨軍駐福州鄭錦將徐耀以三萬人至烏龍江南軍小門直鳳諸山又與總兵董大來夾擊之破其壘十四賊大潰進駐泉州土寇數謀亂輒敗去徙守漳州十七年二月寇陷石碼逼海澄從黃芳世赴援敗寇彎腰樹觀音山寇收餘衆壘石碼拒師逾月寇舟二百乘潮至與石碼寇相表裏將夾擊我軍瑚圖從芳世堅守潛令總兵黃藍襲其後擊之毀其舟九寇保壘海

澄園解時漳州兵少瑚圖晝夜循徼不少休錦兵連踪數百蹈環入東關砲擊之退已復至構山寇蔡寅扼天寶山截我饒道瑚圖督戰焚其船寇殊死戰不少卻會芳世援師至迺遁去未幾劉國軒吳淑復破海澄陷長泰饒道又阻瑚圖以八百人扼要路淑率萬餘衆逼漳州國軒夾水而軍爲聲援值副都統沃中率師至瑚圖從資塔分路進擊至蔗林遇伏師少卻瑚圖斬卻退者三人衆迺奮進連破十六營寇退據長泰謀犯南靖瑚圖引兵進寇以兵五萬分軍龍虎蜈蚣二山復與沃申麾衆力戰寇迺敗棄營走遂克之然寇猶據江東橋不退資塔軍其西而令瑚圖沃申與提督石調聲取橋東岸乃間道踰朝天嶺過龍江口深入寇軍奮擊寇棄寨走入舟據橋口急擊之寇出江遁漳泉路始通國軒還海澄十八年寇頓龜頭山復數窺江東橋謀斷我後路師分四路入瑚圖與副都統瑪思文爲一路擊敗之十九年攻克玉洲各寨寇敗竄廈門海澄再復隨資塔赴潮州再戰破賊閩粵平還江甯二十三年擢杭州將軍二十六卒詔獎其清慎予卹諡敏恪瑪哈達修佳氏滿洲正白旗人禮部承政巴都

里孫康熙七年自參領擢正白旗滿洲副都統吳三桂反詔守兗州徙安慶精忠叛赴浙參贊賚塔軍務時大將軍傑書至金華精忠將陳重自東陽來犯瑪哈達與都統石調聲等敗之山口村小河岸追擊至鄭家店俄精忠將徐尙朝擁衆五萬人犯金華距城十二里結寨瑪哈達與台吉察渾都統巴雅爾總兵李榮等分兵擊敗之精忠將張元兆以二萬人屯壽溪又與巴雅爾榮移兵擊之破壘十八斬兆元及其衆二千餘尙朝復據積道山與總兵陳世凱等乘霧進兵破其木城十四年擊精忠將沙有祥等於桃花嶺復處州尙朝有祥等又來攻復與察渾榮世凱分兵擊敗之十五年擢杭州將軍傑書下福建瑪哈達從賚塔自衢州率兵先驅大溪灘仙霞嶺諸役戰常陷堅進復建甯延平還杭州論功予三等阿達哈哈番二十三年召授正白旗滿洲都統坐補官徇情罷遣戍黑龍江二十八年卒

傑殷韓氏滿洲正紅旗人其先爲朝鮮人父義歸太祖授世職一等參將傑殷初授一等侍衛累遷正紅旗滿洲副都統康熙十一年遷護軍統領十四年察

哈爾布爾尼叛從內大臣佟國綱率師駐宣府王輔臣叛上命將軍畢力克圖率師駐大同以傑股參贊軍事土寇朱龍據榆林畢力克圖移師討之次謝村分兵爲三隊傑股乘夜先發黎明次河岸賊三千餘據楊家店渡口傑股督兵渡河擊賊賊潰克吳堡遂趨綏德賊屯虎爾崖山口傑股督兵仰攻殲其裨將俘七十餘人進破臥牛城復米脂延川諸縣復進收延安及諸屬縣並定宜川縣境二十六寨再進攻平涼大將軍貝勒洞鄂令傑股領左翼兵爲前鋒輔臣以萬餘人列陳迎戰傑股督兵擣其中堅戰自己至未凡三勝復分兵環擊殲滅甚衆自是屢擊卻輔臣兵十五年吳三桂將吳之茂以萬餘人屯秦州爲輔臣聲援洞鄂令傑股移師禦之戰谷口山崖斬五十餘級與將軍佛尼埒提督王進寶會師議出賊後斷糧道傑股督兵先行戰羅家堡戰鹽關戰三十里鋪屢擊敗之茂護糧兵之茂揚言將斷臨洮鞏昌道傑股移師伏羌戰平頭山戰馬塢又屢擊敗之茂護糧兵破其壘克通渭還駐秦州大將軍圖海下平涼之茂引兵走傑股與佛尼埒率師夜追之及於牡丹園力戰破陳克祁山堡之茂

別部兵自西和至敗之祁山嘴又敗之清陽峽選輕騎逐之茂及於石牙兒關之茂以二十人越山遁斬五千餘級俘五百餘人克禮西和二縣三桂將王屏藩走階州督兵追之降其兵三百餘復還駐秦州十九年攻保甯克順慶並復所屬州縣進駐成都尋卒賜祭葬予世職拜他喇布勒哈番弟傑都順治十六年以巴牙喇甲喇章京從將軍達素徇廈門破鄭成功舟師康熙十三年從前鋒統領穆占自陝西入四川破之茂裨將石存禮於朝天關趨保甯屯蟠龍山屏藩引衆劫營絕我師饗道師引退傑都殿力戰死之子世職拜他喇布勒命番兼拖沙喇哈番

瓦爾喀完顏氏滿洲鎮紅旗人初任噶布什賢壯達稱驍勇中創不少卻數被優資崇德時從貝勒岳託伐明攻懷來寶坻略山東攻克海豐並先登又從貝勒阿巴泰攻范縣薄城以矛鑿垣爲磴緣而上克之順治初從肅親王豪格徇四川數擊敗張獻忠兵有護軍阿納海者爲敵困瓦爾喀策馬突前格殺二人翼之出與梅勒額真烏拉禪駐防大名擊土寇累進三等阿達哈哈番授工部

理事官董修宮殿進一等十六年署噶布什賢章京從固山額真卓洛駐防雲南討平元江土司康熙元年還京授參領兼督捕理事官遷西安副都統七年擢將軍十二年吳三桂反湖南廣西皆應命瓦爾喀偕佛尼埒赴四川備守禦許便宜行事師次漢中分三道入擊叛將譚宏野狐嶺發其伏殲之乘勝復陽平七盤朝天諸關先後斬萬餘級獲旗幟器械稱是時賊據保甯師進徧鑿壕塹與相持久弗下瓦爾喀遂疾卒於軍謚襄敏尋追論保甯不疾進兵又守陞弗殿損將士部議追奪官階世職並削諡

論曰希福將莽依圖所部轉戰下雲南功最多鄂克遜徧圖等皆與攻雲南而徧圖留鎮三十年撫定創夷瑚里布達理善以夙將從軍額楚戰廣西額斯泰戰湖南瓦岱戰江西沃申戰閩浙傑殷瓦爾喀戰川陝皆有功績是時傾禁旅以出八旗將士敵愾策勳斯其尤炳著者也

清史稿

列傳四十六

宜里布

哈克三

阿爾護

路什

雅賚

擴爾坤

王承業

王 七 年

宜里布他塔喇氏滿洲正白旗人阿濟格尼堪子也初授兵部副理事官順治八年襲三等伯爵兼管牛兔恩詔進一等伯擢刑部侍郎調吏部鄭成功據臺灣爲亂議者謂當徙瀕海居民入內地以避剽掠絕接濟命宜里布與尙書蘇納海歷江南浙江福建勘疆界既定還京師擢正白旗蒙古都統康熙七年調本旗滿洲都統列議政大臣吳三桂反十三年大將軍順承郡王勒爾錦率師討之以宜里布參贊軍務既至荊州三桂自常德攻陷松滋襄陽總兵楊來嘉副將洪福叛附之壁穀城鄖陽間窺視郡邑詔宜里布守宜昌十四年來嘉等犯南漳順承郡王承制授宜里布討逆將軍印與副都統根特往援來嘉等引

退旋復犯均州壘武當山下宜里布督兵擊之斬千餘級來嘉等復引退時三桂屯松滋北山緣江置戰艦謀水陸並進命宜里布與都統范連禮等守襄陽均州諸處三桂遣其將張以誠與來嘉等寇南漳宜里布與總督蔡毓榮分率勁旅夾擊斬三千餘級十六年命與將軍穆占率荊州滿洲兵自岳州下長沙克茶陵三桂兵奔攸縣宜里布追擊之斬四千餘級俘百餘克攸縣十七年穆占師進克郴州永興諸處駐師郴州而令宜里布守永興三桂遣其將馬寶胡國柱等來犯與副都統哈克三督兵禦之力戰殞於陣喪還遣內大臣奠茶酒復遣侍衛諭其母曰宜里布侍朕久深知其爲人出師有勞績方謂功成奏凱即可相見忽聞陳沒悽愴痛悼爾家貧予白金六百爲治喪資賜祭葬諡武壯子阿什坦襲爵

哈克三佟佳氏滿洲正藍旗人父法薩里巴圖魯以驍騎校從征戰沒哈克三初授禮部筆帖式累遷員外郎順治十四年改授巴牙喇甲喇章京康熙二年李自成餘孽李來亨等據茅麓山剽掠爲民害從將軍穆里瑪等討之賊入山

哈克三從巴牙喇藏章京堪泰自山後進大破之復與總兵于大海夾擊多所斬馘來亨自縊死擄正藍旗蒙古副都統十二年調滿洲副都統尋遷護軍統領十四年察哈爾布爾尼叛大將軍信郡王鄂札率師討之哈克三參贊軍務師次達祿布爾尼列陣以待而隱兵山谷間以誘我師土默特兵遇伏哈克三力禦敗之復督驍騎突賊陳賊潰奔斬馘甚衆布爾尼以三十騎遁叙功授三等阿達哈哈番十六年大將軍簡親王喇布討吳三桂哈克三參贊軍務三桂將韓大任據萬安哈克三與副都統雅沁等分道進大任渡河走哈克三以山逕隘不容騎請調綠旗兵守隘斷賊餽道上責其稽延敕窮追毋縱入楚賊竄興國山中追擊之黃塘新田鋪師舍騎而徒奮擊賊大潰復選輕騎夜逐賊至姜坑嶺賊據險自保哈克三分兵環攻斬千餘級大任等收餘衆走福建屯老虎洞十七年三月與都統巴雅爾副都統錫三雅沁布舒庫等分隊奪隘斬六千餘級獲所置總兵以下三百餘大任窮蹙率衆詣康親王軍降哈克三還吉安旋命赴湖南與將軍穆占會師駐郴州三桂將馬寶胡國柱攻永興急穆占

令哈克三率師赴援與都統宜里布力戰同歿於陣喪還道內大臣奠茶酒予白金五百治喪賜祭葬諡武毅進世職一等阿達哈哈番兼拖沙喇哈番無子以弟之子巴爾泰襲

阿爾護富察氏滿洲鎮紅旗人世居輝發父鄂拜國初來歸管牛彘從入關擊走李自成復從征福建有功予世職一等阿達哈哈番累遷鎮紅旗蒙古副都統阿爾護初授王府長史康熙十三年命署副都統與將軍坤巴圖魯率師出駐汝甯其冬吳三桂將王屏藩等自四川窺陝西提督王輔臣叛應之與坤巴圖魯赴西安十四年將五百人守寶雞賊來犯擊之敗去追至天王村撫定歸州十二堡降其將七兵千餘八月詔分將軍佛尼埒兵六百授阿爾護守棧道諸險要與三桂將彭時亨戰仰天池大捷出螞蟻河口望見賊營分立九龍山即以銳師宵加之賊大潰十月三桂將石存禮等擁衆八千出棧道據益門鎮口分七營窺寶雞兼爲王輔臣聲援阿爾護令軍中曰有能攻剋隘口者賞與克州縣城同軍士氣奮分三道上直搗其巢力戰自己至未七營盡破追奔十

數里射殪其將獲旗幟器械無算迭破賊仰天池山下及益門鎮東邵家山黃
兒子溝沈家坡諸處自是賊不敢出棧道十五年授鎮紅旗蒙古副都統從將
軍穆占移師湖廣十六年三桂將吳國貴犯長沙力戰死之事聞諡敏壯子三
等阿達哈哈番

路什納喇氏滿洲鎮黃旗人世居章甲城父克恩歸太祖路什以驍勇稱崇德
七年師入兗州以雲梯攻城路什先登克之賜號巴圖魯子世職游擊順治初
以甲喇額真從入關與牛彖額真袁泰將步兵擊李自成復與梅勒額真阿哈
尼堪遂自成至慶都敗之自成潰而西二年從英親王阿濟格徇陝西與梅勒
額真阿喇善攻綏德圍延安七戰七克時自成南走商州奔湖廣躡追至武昌
獲其孥論功進二等張獻忠據蜀久不下三年從肅親王豪格西征會叛將賀
珍等犯漢中分兵守雞頭關路什與巴牙喇囊章京繁拜擊卻之追破珍於楚
湖入四川所向皆捷獻忠既滅分兵勦餘賊俘斬甚衆進三等阿思哈尼哈番
十五年從信郡王多尼南征師入貴州明桂王將羅大順出拒戰於黔西州十

萬溪箐路什與噶布什賢噶喇統昂邦鄂訥梅勒額真噶褚哈分兵擊之連破數營敵大潰叙功進二等吳三桂反路什年已七十請從征遂從貝勒尙善徇湖南康熙十七年秋以偏師取湘陰進洞庭湖守九馬嘴寇至風大作泊綠林灘舟被擊路什猶奮勇發矢石擊殺十數人力竭死時七月二十八日也事聞進一等兼拖沙喇哈番子布納海襲聖祖親征噶爾丹布納海從內大臣費揚古出西路戰於昭莫多師有功進三等精奇尼哈番卒子瑚什屯降襲二等阿思哈尼哈番

雅賚納喇氏滿洲正藍旗人初任王府長史兼佐領康熙十三年命署副都統駐防江甯未至徙駐安慶耿精忠遣其將擾江西廣信建昌饒州並陷大將軍安親王岳樂率禁旅南征駐南昌以雅賚與署領都統阿喀尼參贊軍務移兵攻彭澤既訖知賊據小姑山先遣兵擊之賊結水寨拒戰我軍出其後陟山而下斬其裨將餘衆多被創赴水死師進攻彭澤城西臨江南北皆倚山路險峻乃督兵略其東陟山樹雲梯以登賊不能抗縱火啟東門走追擊敗之遂進攻

湖口安親王軍至賊棄城走都昌雅賚追及之敗竄鄱陽湖所置吏以湖口降十二年將水師逐賊鄱陽湖趨五桂寨賊棄寨走其將黃浩浮舟來犯擊卻之追至梅溪瑞洪康山湖及壩口先後得船數百斬數千級與陸軍會首蓆灣克餘千縣復進征建昌精忠將邵連登據常興山列營三十雅賚攻其左諸軍自右擊之盡夷其巢連登中流矢死復與都統霍特征廣昌次石峽方暑士馬疲渴猝遇伏師少邵雅賚直前奮戰中礮死賜祭葬諡襄壯子世職拜他喇布勒哈番

擴爾坤薩克達氏滿洲鑲紅旗人世居那穆都魯祖葉古德歸太祖編牛錄俾統之父喜福任兵部理事官崇德間從征黑龍江順治初從征漢中皆有功復出討姜瓖瓖將屯密武關分據左衛喜福力戰被巨創卒於軍世職累進二等阿達哈哈番擴爾坤初授牛錄額真從征貴州戰屢捷康熙初襲職遷護軍參領擢鑲紅旗蒙古副都統吳三桂反命率師駐防太原十三年徙駐西安會四川告警命進駐漢中三桂將吳之茂犯廣元遣兵敗之復分水陸兼進又擊之

敗去之茂遣裨將賀騰龍劫糧二郎關擴爾坤馳擊獲騰龍之茂復遣裨將何德成犯廣元分兵渡河擊郤之遂北三十餘里尋以七盤朝天諸關復陷賊昭還駐漢中十四年漢中乏饟將軍錫卜臣領兵還城固擴爾坤率右翼兵殿後三桂將彭時亨等擁衆八千據險邀阻擴爾坤擊潰之且戰且行三晝夜次洋縣金水河七戰皆捷諸軍前行仍令擴爾坤殿俄賊環逼力戰中創殞於陣賜祭葬進世職三等阿思哈尼哈番子遜扎齊襲職官至工部尙書

王承業字瓊山江南廬江人少入伍康熙初從軍福建克金門廈門累擢游擊遷廣西副將十七年將軍莽依圖徇廣西以承業爲新設援剿中營總兵管副將事十八年吳世璠犯梧州承業擊敗之世璠棄營宵遁克潯州世璠以十萬人分屯貴州廣西諸要隘而自將兵圍南甯承業赴援設奇與城兵相犄角戰新村西山之巔斬六千餘級世琮負重傷敗走南甯圍解遂自陶鄧山進剿柳州叛將馬承廢以二萬人拒戰擊敗之乘勝定象州承廢遂降其冬將軍賚塔自南甯直進雲南檄承業至西隆世璠將何繼祖據石門坎去安籠所三十里

地僻道險十九年正月承業奮勇入連奪二隘口復所城繼祖退據黃草壩列象拒戰承業疾擊之自卯至未毀其營二十有二克曲靖取密益下馬龍楊林大小三十餘戰無不披靡既抵會城壁城外歸化寺世璠將胡國柄劉起龍出拒承業引守備林廷燠鏖戰自卯至午突入賊陳礮中額墜馬死廷燠單騎馳救賊矢雨集亦殞於陣事聞詔贈承業右都督廷燠贈都司僉事王忠孝奉天人以參將銜從軍屢有功累擢署左翼總兵官從將軍賚塔下雲南爲前鋒克西隆攻廣西縣忠孝與所部游擊林桂選勇士數十人越嶺疾馳下大破賊攻石門坎師盛旗幟鳴鼓角趨上游忠孝與桂督兵涉水出間道繞其後破敵砦攻黃草壩與桂引敵入谷伏起夾擊斬世璠軍裨將既破隘師進薄雲南會城國柄等出戰忠孝與承業廷燠同時戰死贈都督同知廷燠廣東南海人桂廣東番禺人忠孝既戰沒桂佐賚塔定雲南代爲左翼總兵官

論曰吳三桂白首舉事號善用兵屯松滋數年不敢渡江攻荊州晚欲通贛粵道宜理布哈克三以死拒然終不得達安在其爲善用兵也阿爾護輩殺敵致

果授命疆場承業戰沒雲南城下悍敵致死誠有不易當者故比而論之亦以見揆定始末他死事者語別見忠義傳不能徧著也

清史稿

列傳四十七

姚啟聖

字維

吳興祚

施琅

字天貴

姚啟聖字熙止浙江會稽人少任俠自喜明季爲諸生順治初師定江南遊通州爲土豪所侮乃詣軍前乞自效檄署通州知州執土豪杖殺之棄官歸郊行遇二卒掠女子故與好語奪其刀殺之還女子其家去附族人籍隸鎮紅旗漢軍舉康熙二年八旗鄉試第一授廣東香山知縣前政負課數萬繫獄啟聖牒大府悉爲代償尋以擅開海禁被劾奪官十三年耿精忠反兵入浙江境陷溫州傍近及台處諸屬縣聖祖命康親王傑書統師進討啟聖與子儀募健兒數百詣軍以策于王檄署諸賢知縣剿平紫邱山上寇十四年以王薦超擢溫處道僉事從都統拉哈達克松陽宣平二縣十五年借副都統沃申總兵陳世凱等勦賊石塘焚其木城斬獲甚衆乘勝復雲和先是精忠以書招鄭錦錦至復拒之將士多爲內應錦遂取泉漳二府據廈門精忠與戰復屢敗啟聖又使儀

破精忠將會養性於溫州十月師入仙霞關趨福建精忠降擢啟聖福建布政使率兵討錦吳三桂將韓大任驍勇善戰世稱小淮陰者也自贛入汀謀與錦合啟聖說之降簡其部卒得死士三千人以為親軍十六年從康親王復邵武興化盡取漳泉地錦遁歸廈門總督耶廷佐奏啟聖與子儀屢著戰功贈軍購馬具甲冑弓矢糜白金五萬皆出私財詔嘉獎十七年錦遣其將劉國軒吳淑何佑等復犯漳泉海澄公黃芳世都統穆赫林提督段應舉等與戰敗績遂陷海澄長泰同安惠安平和諸縣詔擢啟聖福建總督條上機宜請調福甯鎮兵助攻泉州調衢州贛州潮州三鎮兵助攻漳州復設漳浦同安二總兵增督標兵五千通省經制兵萬八千申明臨陳賞罰禁斷役占兵額下議政王大臣議衢贛潮三路皆重地未便徵發既增督標兵毋庸復廣通省兵額餘皆從其議七月借海澄公黃芳度自永福進克平和漳平國軒等解泉州圍進逼漳州壁於蜈蚣嶺啟聖率壯士鍾寶張黑子等出戰將軍賀塔都統沃中等夾擊連破賊寨斬其將鄭英劉正璽等十餘人國軒遁海澄乘勝復長泰叙功進正一品

九月復遣儀率兵攻同安敵棄城遁斬其將林欽等尋借副都統吉勒塔布提督楊捷等進攻海澄敗國軒於江東橋又敗之於潮溝十八年國軒與泐佑等踞郭塘歐溪頭欲斷江東橋以犯長泰啟聖借資塔捷及巡撫吳興祚等邀擊大敗之先後招降所置吏四百餘兵一萬四千有奇國軒等復率萬餘人謀奪榴山寨啟聖借資塔及副都統石調聲擊敗之至太平橋潮溝斬千餘級十九年會資塔等攻海澄時提督萬正色先克海壇啟聖及總兵趙得壽黃大來等分兵七路並進破十九寨別遣將渡海拔金門廈門降錦將朱天貴等錦退保澎湖盡復所陷郡縣進兵部尙書太子太保二十年左都御史徐元文劾啟聖疏請借司庫銀十二萬經營取息侵占民利題報軍前捐銀十五萬皆剋軍餉賧民膏而得閩民極困啟聖不能存撫拆毀民居築園亭水閣日役千人舞女歌兒充牣房閨又強取長泰戴氏女爲妾海壇進師力爲阻撓及克廈門又言當直取臺灣始欲養寇繼欲窮兵吳興祚萬正色平海奏功啟聖慚妒妄謂正色與錦將朱天貴有約讓海壇而去險詐欺誣乞敕部嚴議上令啓聖覆奏啟

聖言臣於康熙十七年十月進兵至鳳凰山因一時投誠者多犒賞不繼與撫臣吳興祚議外省貿易頗有微利前督臣李率泰經略洪承疇嘗借帑爲之遂冒昧上疏未蒙俞允臣自入仕京師未有產業而軍前捐銀十五萬有奇者香山罷官後貿易七年得積微資併臣浙江祖產變價及親朋借貸經年累月而後有此臣於十七年七月至省見總督官廨爲耿精忠屯兵毀傷傾圯因捐貲修整日役不過數十柵外員役私舍令其自行撤除至臣妾皆有子女年已老大並無歌兒舞女強取戴氏女尤無其事十八年十一月臣密陳進剿機宜請水陸五道進兵並未阻撓至得廈門即攻臺灣先於十八年九月預陳亦非屆時發議撫臣提臣拜疏出師平賊首功已定臣何所容其慚妒朱天貴應撫投誠天貴言之而臣始知之臣任三閩三職雖無妒功之心實有溺職之咎乞敕部嚴議別簡賢能疏入報聞二十一年敕克海澄金門廈門功授世職拜他喇布勒哈番兼拖沙喇哈番方鄭錦屢入寇徙濱海居民入內地俾絕接濟避侵掠下令越界者罪至死民多蕩析及禁旅班師驅繫良民子女北行啓聖白王

嚴禁復捐贖歸難民二萬餘人並請開海界復民業聽降卒墾荒民困漸蘇及錦死子克塽仍其爵稱延平王凡事皆決之國軒等啟聖令知府下永譽張仲舉專理海疆多以金帛間其黨與克塽乃遣使齋書願稱臣入貢不薙髮登岸如琉球高麗例啟聖以聞上不許趣水師提督施琅進征二十二年六月琅進攻臺灣取澎湖啟聖駐廈門督饋餉以大舟載金繒貨米至軍大資降卒遣之歸臺民果携貳復設間使克塽與國軒互相猜衆莫爲用琅遂定臺灣克塽國軒等皆降語具琅傳啟聖還福州未幾疽發背卒明年部議以啟聖修繕船舶軍械浮冒帑金四萬七千有奇應追繳上念其勞免之子儀膂力絕人雄偉與父埒初以捐納知縣從征累戰有功康熙王檄署游擊議敘內擢郎中上以儀有才略且自陳願以武職自效改都督僉事以總兵用歷狼山杭州沅州鶴慶諸鎮總兵鎮紅旗漢軍副都統卒賜祭葬鍾寶少業屠流爲盜啟聖令香山招之降後啟聖征福建寶偕同降者二十人隸麾下每戰輒當前所向有功累進秩都督僉事啟聖卒遂歸後數年部議注官授潼關參將邊靖邊協副將卒

寶撫兵民有恩稱爲鍾佛子韓大任降後入覲聖祖以其爲三桂將留爲內務府包衣參領二十九年從修國綱征噶爾丹次烏蘭布通伏發國綱歿於陣大任驚曰吾聞臨陣失帥兵家大罪吾以叛逆之黨蒙恩不死今豈可坐必死之律復對獄吏乎因馳入賊陣手刃數十人死之

吳興祚字伯成漢軍正紅旗人原籍浙江山陰父執忠客禮親王代善幕授頭等護衛興祚自貢生授江西萍鄉知縣金聲桓叛郡縣多被寇萍鄉以有備獨完坐事能旋以守禦功復官授山西大寧知縣遷山東沂州知州白蓮教嘯聚爲患興祚開諭散遣之復坐事降補江南無錫知縣縣吏虧庫帑更數政未得償官罷不能去興祚至爲請豁除其當償者出私財代輸清丈通縣田編號繪圖因田徵賦飛詭隱匿皆不得行縣徭役未均最煩苦者爲圖六興祚以入官田徵租雇役民害乃除歲飢爲粥食餓者八旗兵駐防蘇州興祚請於領兵固山單騎彈壓兵或取民雞立笞之皆奉約束塘溢兵不得度立竹於塘旁懸燈以爲識騎行如坦途康熙十三年遷行人仍留知縣事用漕運總督帥顏保薦

超擢福建按察使有朱統錮者號明齋耿精忠私署教遠將軍及精忠降自稱
宜春王據貴溪爲亂與福建錯壤興祚輕騎至光澤撫其將陳龍等遣降將陽
自歸爲內應令龍導師入其將馮珩等縛統錮率兵三千以降十七年擢巡撫
時鄭錦踞臺灣遣其驍將劉國軒等陷漳泉屬縣復圍泉州興祚率標兵自興
化赴援至仙遊錦將黃球等率二千人結土寇萬餘屯白鶴嶺興祚分兵三道
自當中路與戰自辰至酉相持不即退興祚遣兵自間道奪白鶴嶺關口斬級
六百墮岸溺水死者甚衆寇乃潰走追敗之於嶺頭灣復永春德化二縣國軒
自泉州走入海以巨艦數百出沒赤嶼黃崎諸處興祚遣總兵林賢等統水師
出海分三路夾攻焚敵艦六十餘俘斬六千有奇疏報捷並言海逆逼犯潭泉
大軍由陸路進發跋涉疲難臣前捐募水兵一戰破賊但兵力稍薄未易輕取
廈門若得水師二萬再添造戰船可直搗巢穴掃蕩鯨波詔允行十八年國軒
率兵二千至郭塘歐溪頭欲斷江東橋以犯長泰興祚與都統吉勒塔布總督
姚啓聖會師擊走之興祚遣驛傳道王國泰等招降錦將蔡沖瑛林忠等三百

八十五人兵萬二千五百拔難民千二百得舟六十七敘前後功進秩正一品十九年疏言鄭錦盤踞廈門沿海生靈受其荼毒臣去冬新造戰船水師提督萬正色分配將士自閩安出大洋操練俟舊存船艘修葺完整江南廠手齊集即相機進取廈門二月正色師進海壇興祚自泉州會甯海將軍拉哈達總兵王英等赴同安攻克泗洲灣尾諸隘渡海拉哈達出中路英右興祚左奮戰敵大潰遂克廈門時正色已取海壇降錦將朱天貴等復遣兵取金門餘衆悉竄臺灣捷聞詔嘉獎下部優敘興祚因請留澳民防守獨荒田租糧減關課正色亦請於海澄廈門分兵駐守上命侍郎溫岱赴福建會議溫岱至敕聖與言正色復海壇與天貴先有約乃進兵無殺賊攻克事溫岱還京師兵部據其言議興祚冒功上命仍議敘予世職拜他喇布勒哈番兼拖沙喇哈番二十年擢兩廣總督興祚上官疏言尙之信在廣東橫徵苛歛民受其害數十年因舉鹽埠渡稅稅總店漁課諸害悉奏罷之自邊界令下廣東沿海居民多失業興祚疏請展界恣民捕採耕種上遣尙書杜臻內閣學士石柱會興祚巡歷規畫兵民

皆得所又言潮州海汛遼闊商民往來貿易恐宵小潛蹤應令澄海協達豪營水汛官兵船隻改歸南澳水師鎮統轄與碣石鎮互相聯絡巡防外海島嶼詔並允行二十四年疏請於廣東廣西二省設爐鼓鑄給事中錢晉錫御史王君詔疏劾興祚鼓鑄浮冒下吏議當鑄秩命以副都統用三十一年授歸化城右翼漢軍副都統復坐事鑄秩三十六年上征噶爾丹命自呼坦和碩至甯夏安十三塘興祚願効力坐沙克舒爾塘未幾復原秩三十六年卒興祚爲政持大體除煩苛卒後遠近戴之歷官之地並顯祀名宦

施琅字琢公福建晉江人初爲明總兵鄭芝龍部下左衝鋒順治三年師定福建琅從芝龍降從征廣東戡定順德東莞三水新甯諸縣芝龍歸京師其子成功竄踞海島招琅不從成功執琅並繫其家屬琅以計得脫父大宣弟顯及子姪皆爲成功所殺十三年從定遠大將軍貝子濟度擊敗成功於福州授同安副將十六年成功據臺灣就擢琅同安總兵康熙元年遷水師提督時成功已死其子錦率衆欲犯海澄琅遣守備汪明等率舟師禦之海門斬其將林維獲

戰船軍械未幾靖南王耿繼茂總督李率泰等攻克廈門敵驚潰琅募荷蘭國水兵以夾板船要擊斬級千餘乘勝取浯嶼金門二島敘功加右都督三年加靖海將軍七年琅密陳錦負嶼海上宜急攻之召詣京師上詢方略琅言賊兵不滿數萬戰船不過數百錦智勇俱無若先取澎湖以扼其吭賊勢立絀倘復負固則重師泊臺灣港口而別以奇兵分襲南路打狗港及北路文港海翁壩賊分則力薄合則勢蹙臺灣計日可平事下部議寢其奏因裁水師提督授琅內大臣隸鎮黃旗漢軍二十年錦死子克塽幼諸將鄭國軒馮錫範用事內閣學士李光地奏臺灣可取狀因薦琅習海上事上復授琅福建水師提督加太子少保諭相機進取琅至軍疏言賊船久泊澎湖悉力固守冬春之際颶風時發我舟驟難過洋臣今練習水師又遣間諜通臣舊時部曲使爲內應俟風便可獲全勝二十一年給事中孫蘆疏言宜緩征臺灣七月彗星見戶部尙書梁清標復以爲言詔暫緩進勦琅疏言臣已簡水師精兵二萬戰船三百足破滅海賊請趣督撫治糧餉但遇風利即可進行並請調陸路官兵協剿詔從之二

十二年六月琅自桐山攻克花嶼貓嶼草嶼乘南風進泊八罩國軒踞澎湖緣岸築短牆置腰銃環二十餘里爲壁壘琅遣遊擊藍理以烏船進攻敵舟乘潮四合琅乘樓船突入賊陣流矢傷目血溢於帕督戰不少卻總兵吳英繼之斬級三千克虎井桶盤二嶼旋以百船分列東西遣總兵陳蟒魏明董義康玉率兵東指雞籠峪四角山西指牛心灣分賊勢琅自督五十六船分八隊以八十船繼後揚帆直進敵悉衆拒戰總兵林賢朱天貴先入陣天貴戰死將士奮勇衷擊自辰至申焚敵艦百餘溺死無算遂取澎湖國軒遁歸臺灣克壘大驚遣使詣軍前乞降琅疏陳上許之八月琅統兵入鹿耳門至臺灣克壘率屬擁髮迎於水次繳延平王金印臺灣平自海道報捷疏至正中秋上賦詩旌琅功復授靖海將軍封靖海侯世襲罔替賜御用袍及諸服物琅疏辭侯封乞得如內大臣例賜花翎部議謂非例上命毋辭並如其請賜花翎遣侍郎蘇拜至福建與督撫及琅議善後事有言宜遷其人棄其地者琅疏言明季設澎水標於金門出汛至澎湖而止臺灣原屬化外土番雜處未入版圖然其時中國之民潛

往生聚已不下萬人鄭芝龍爲海寇據爲巢穴及崇禎元年芝龍就撫借與紅毛爲互市之所紅毛聯結土番招納內地民漸作邊患至順治十八年鄭成功盤踞其地糾集亡命荼毒海疆傳及其孫克塽積數十年一旦納土歸命善後之計尤宜周詳若棄其地遷其人以有限之船渡無限之民非閱數年難以報竣倘渡載不盡竄匿山谷所謂藉寇兵而齎盜糧也且此地原爲紅毛所有乘隙復踞必竊窺內地鼓惑人心重以夾板船之精堅海外無敵沿海諸省斷難安然無虞至時復勤師遠征恐未易見效如僅守澎湖則孤懸汪洋之中土地單薄遠隔金門廈門豈不受制於彼而能一朝居哉臣思海氛旣靖汰內地溢設之官兵分防兩處臺灣設總兵一水師副將一陸營參將二兵八千澎湖設水師副將一兵二千初無添兵增餉之費已足固守其總兵副將參遊等官定以二三年轉升內地其地正賦雜糧暫行蠲豁駐兵現給全饟三年後開徵濟用卽不盡資內地轉輸蓋籌天下形勢必期萬全臺灣雖在外島關四省要害斷不可棄並繪圖以進疏入下議政王大臣等議仍未決上召詢廷臣大學士

李蔚奏應如琅請尋蘇拜等疏亦用琅議並設縣三府一巡道一上命允行琅又疏請克塽納土歸誠應攜族屬與劉國軒馮錫範及明裔朱恆等俱詣京師詔授克塽公銜國軒錫範伯銜俱隸上三旗餘職官及恆等於近省安插墾荒復疏請申嚴海禁稽核貿易商船命如所議二十七年入覲溫旨慰勞賞賚優渥上諭琅曰爾前爲內大臣十有三年當時尙有輕爾者惟朕深知爾待爾甚厚後二逆平定惟海寇潛據臺灣爲福建害欲除此寇非爾不可朕特加擢用爾能不負任使舉六十年難靖之寇殄滅無餘或有言爾恃功驕傲朕令爾來京又有言當留勿遣者朕思寇亂之際尙用爾勿疑况天下已平反疑而勿遣耶今命爾復任宜益加敬慎以保功名琅奏謝言臣年力已衰懼勿勝封疆之重上曰將尙智不尙力朕用爾亦智耳豈在手足之力哉命還任三十五年卒於官年七十六贈太子少傅賜祭葬諡襄壯琅治軍嚴整通陳法尤善水戰諳海中風候將出師值光地請急歸問琅曰衆皆言南風不利今乃刻六月出師何也琅曰北風日夜猛今攻澎湖未能一戰克風起舟散將何以戰夏至前後

二十餘日風微夜尤靜可聚泊大洋觀釁而動不過七日舉之必矣卽偶有颶風此則天意非人慮所及鄭氏將劉國軒最驍以他將守澎湖雖敗彼必再戰今以國軒守敗則膽落臺灣可不戰而下及戰雲起東南國軒望見謂颶作喜甚俄雷聲殷殷國軒推案起曰天命矣今且敗人謂琅必報父仇將致毒於鄭氏琅曰絕島新附一有誅戮恐人情反側吾所以銜恤茹痛者爲國事重不敢顧私也子世綸世驄自有傳世范襲爵朱天貴福建莆田人初爲鄭錦將康熙十九年師下海壇以所部二萬人舟三百來降授平陽總兵琅攻澎湖天貴以師會國軒拒戰天貴以十二舟薄敵壘焚其舟殺傷甚衆戰益力俄中飛礮仆舟中猶大呼殺賊遂卒贈太子少保諡忠壯

論曰臺灣平琅專其功然啓聖興祚經營規畫戡定諸郡縣及金廈既下鄭氏僅有臺澎遂聚而殲先事之勞何可泯也及琅出師啓聖興祚欲與同進琅遽疏言未奉督撫同進之命上命啓聖同琅進取止興祚母行既克啓聖告捷疏後琅至實不及鬱鬱發病卒功名之際有難言之矣大敵在前將帥內相競審

擇堅任一戰而克非聖祖善馭羣材曷能有此哉

清史稿

列傳四十八

楊捷

石圍

萬正色

吳英

藍理

黃梧

子芳度 從子芳世 芳鼎

穆赫林

段 恩 舉

楊捷字元凱義州人先世居實應明初以軍功授後屯衛指揮使世襲遂家焉捷初爲明裨將順治元年來降授山西撫標中軍遊擊鳳州土寇高九英等聚衆剽掠巡撫馬國柱檄捷捕治斬九英毀其巢國柱遷總督以捷爲督標中軍參將旋擢副將四年師定廣東命捷率宣化大同兵三千往鎮撫五年行次池州金聲桓李成棟叛大將軍譚泰請以捷駐防九江會勦卽授九江總兵率兵復都昌獲聲桓所置吏余應桂等斬之江西平敘功予世職拖沙喇哈番十年從靖南將軍喀喀木討廣東叛鎮郝尙久復潮州調陝西興安經略大學士洪承疇請留原鎮加右都督調福建隨征右路總兵十二年敘復潮州功進左都

督鄭成功侵掠福建與戰雲霄銅山諸處屢捷十六年擢江南提督會成功陷鎮江窺江寧加太子少保充江南隨征左路總兵駐揚州防江北要汛十八年命署廬鳳提督尋調山東土寇于七敗竄入海捷捕治其黨五十餘人誅之康熙十二年調江南十七年鄭錦攻漳州陷海澄調捷福建轄水陸各軍進少保兼太子太保疏言臣前剿賊雲霄銅山間深知閩兵不力戰自任江南提督召募材健訓練有年擬選三千人隨征福建詔允之捷至福州聞錦犯泉州卽督兵趨惠安錦將劉國軒斷洛陽橋以三千人據陳山壩阻我師捷遣遊擊李璉等襲破之總兵黃大來與副都統禪布等會師洛陽橋南夾擊國軒遁泉州平錦將王一鵬復窺惠安捷令總兵張韜禦之捕斬略盡其別將葉明紀朝佐等出沒德化永春間肅武等以舟師泊湄州窺興化捷遣將防守策應移師至漳州偕副都統吉爾塔布等敗國軒於江東橋又分兵屯守柯坑山鳳山萬松關諸要隘遣別將扼守榴山塞捷初上官疏請別設水師提督得以專禦陸路上授捷昭武將軍領福建陸路提督事十八年國軒率衆劫榴山塞欲奪江東橋

捷會平南將軍賚塔等分兩翼夾擊大敗之於下坑山及歐溪頭斬級千餘獲甲仗無算國軒屯獅子山聯絡遠近各寨爲聲援十九年捷親率健卒剿平烏嶼諸寨與總督姚啓聖總兵姚大來等分下玉洲三汊石碼連破十九寨進取海澄錦將蘇侃以城降遂乘勝與浙江提督石調聲復廈門國軒自銅山竄歸臺灣是年以老病乞罷命還任江南提督敘復海澄功進世職三等阿達哈哈番三十九年卒年七十四贈少傅兼太子太傅諡敏壯孫鑄襲職請改籍揚州衛石調聲漢軍鑲黃旗人以佐領從征廣東敍功予世職拖沙喇哈番遷參領駐防福建擢杭州副都統耿精忠犯浙江調聲迎擊屢卻賊擄浙江提督康熙十七年鄭錦遣國輔等犯海澄詔趣調聲赴援未至而海澄陷康熙親王檄守惠安賊陷同安遂圍泉州惠安亦陷調聲退軍興化與參贊大臣禪布攻復惠安逐北至洛陽橋泉州圍解復借副都統沃申破賊江東橋頃之國軒等復奪橋斷饒道將軍賚塔檄調聲迎擊敗之十九年復廈門金門國軒遁調聲還浙江任初賊陷江山惠安戰士暴骨多未瘞議者以咎調聲二十一年追論奪官及

世職尋卒

萬正色字惟高福建晉江人少入伍以招降海寇陳燦等敍功授陝西興安遊擊康熙十二年吳三桂反正色從西安將軍瓦爾喀征四川叛將譚宏等據陽平關拒戰敗之於野狐嶺乘勝復廣元昭化累擢岳州水師總兵時三桂據岳州扼守洞庭湖套植木爲柵阻我師十七年正色上官率舟師夜入亂葦中拔柵盡擊賊屢敗之三桂將江義巴養元杜輝等率舟二百攻柳林嘴正色與游擊唐善等擊之毀其舟是歲三桂死於衡州其子應麒與輝義等守岳州正色遣千總魏士曾齎書十四分致應麒部將士曾爲所殺應麒亦殺部將之受書者遂內訌其將陳華李超王度冲出降應麒棄城遁遂復岳州正色爲士曾請卹贈守備十八年追敍克陽平關功加左都督大將軍康熙親王傑書征福建耿精忠降而鄭錦猶踞金門廈門陷海澄正色自以閩人習海上事狀因陳水陸戰守機宜言福建負山枕海賊蹤出沒靡常宜擇官兵習於陸者分布要害使賊不得登岸水軍自萬安鎮順流直下金門牽海澄以斷其歸路賊自廈門來

援則從金門掩擊更請闕除沿海邊地雜派設法招撫善爲安置則賊黨自散
疏入詔加太子少保調福建水師總兵擢提督時議檄調荷蘭國船進取廈門
正色疏言荷蘭船遲速莫必延至三四月風信轉南即難前進今新舊烏船俱
集臣與撫臣吳興祚決計進討臣率水師直攻海壇興祚率陸兵爲聲援十九
年正色征海壇分前鋒爲六隊親統巨艦繼之又以輕舟繞出左右并力夾攻
發砲擊沈敵艦溺死三千餘人遂取海壇其將朱天貴遁正色追躡至平海澳
天貴走崇武正色掩擊大敗之與將軍拉哈達總督姚啟聖巡撫吳興祚提督
楊捷會師取廈門天貴降錦窠歸臺灣疏請分兵鎮守澎湖要地上遣兵部侍
郎溫岱莅視尋議銅山廈門諸處量設總兵以下官留水師二萬人分鎮之初
海壇既克下兵部敕功啓聖語溫岱正色先與天貴約乃進兵未嘗與賊戰兵
部疏聞上命仍讓敕予世職拖沙喇布勒哈番上諭正色規取臺灣正色請緩
師二十年改陸路提督二十五年調雲南未幾與鶴慶總兵王珍互訐命與珍
詣京師質問總督范承勳劾正色納賄侵蝕上遣侍郎多奇傅拉塔按治下刑

部論死上以正色功多特宥之奪官仍留世職三十年卒

吳英字爲高福建莆田人幼爲海賊掠置島中更姓王康熙二年赴泉州降授守備劄從提督王進功攻鄭錦拔銅山城加都司僉書銜尋授浙江提標都司十三年耿精忠反其將竹養性侵浙總兵祖宏勳以溫州叛應之分犯寧波紹興英從提督塞白理擊收之降其將李榮春等遷左營游擊十四年養性宏勳率衆十餘萬犯台州英言於塞白理陽修毛坪山徑潛引兵問道自仙居襲賊後賊踞黃巖牛山嶺拒戰英偕游擊曾承等冒矢石前進斬其將劉邦仁等遂復黃巖遷中軍參將十五年貝子傅拉塔規復溫州養性宏勳率三萬人乘夜劫營英分兵五百伏賊後自率精銳據大羊山阻其要道遇賊殊死戰身中數槍師繼進伏盡起賊大潰斬獲無算尋從提督石調聲援象山賊屯石門西溪二嶺英偕游擊侯奇等分兵三道抵慈谿擊沈賊船殲其衆遂復象山九月康熙親王傑書進征福建精忠降養性宏勳引退其將馮公輔猶踞松陽英入山招之降其黨林惟仁等屯處州英剿撫兼用斬賊五百餘降惟仁及兵千餘十七

年錦犯泉州康親王檄調聲赴援英率師從錦將劉國軒據洛陽橋英自上游陳山壩渡江以奇兵出賊後造浮橋濟師前後夾攻斬級六百有奇遷福建督標中軍副將率師援漳州連克十九寨轉戰至江口發礮擊沈敵船遂復海澄十八年國軒復擁衆數萬屯郭塘歐溪頭謀奪江東橋英擊走之擢同安總兵十九年偕甯海將軍拉哈達巡撫吳興祚自同安港口分兵進克廈門歸還歸臺灣是年英奏請復姓二十二年移興化會施琅進攻澎湖英借總兵朱天貴林賢等自八罩嶼乘風進擊游擊監理陷圍英衝入敵陣拔之出翌日進取虎井嶼英右耳中槍益力戰躍入敵艦手刃其將鄭仁餘悉駭竄國軒與鄭克塽乞降事具琅傳二十四年入覲奏言臺灣地勢絕險土番止求衣食素無他願自來小寇竊發皆由內地奸民作祟陸師搜捕易盡前議設水師趕繪雙蓬船百請減十之八留二十船分撥臺灣澎湖二處傳遞文書臺灣澎湖經制官兵一萬員名前議以鹿皮白糖通洋助餽不能如期給發臣見臺灣民田之外別有水田俱屬鄭氏親黨及其部將耕牛甚多請分四千屯田每兵給田三十畝

牛一課耕種農隙操練則兵有恒產饒可省牛疏入命讓行尋移鎮浙江舟山擢四川提督英先以軍功加左都督授世職拖沙喇哈番紘平臺澎功進世職三等阿達哈哈番三十六年調福建陸路提督改水師上南巡英朝行在賜御書榜額召見問福建今有無海寇英對曰海寇斷不至蔓延若蔓延任臣等何用惟海中與城郭不同一水汪洋乘一小舟隨處可藏匿商賈失利不得已走而爲盜往往有之不可遽謂之海寇也上降詔獎英篤實而明達尋授威略將軍仍領水師提督事復御製詩賜之勗以卬勉防微五十一年卒年七十六贈太子少保

藍理字義山福建漳浦人少桀驁膂力絕人集族人勇健者擊殺海寇盧質詣吏欲因以爲功吏疑亦盜也繫之獄康熙十三年耿精忠反悉縱繫者令赴藩下授職理問道走仙霞關詣康熙親王軍降爲鄉導破叛將曾養性於溫州十五年從師入閩授建寧游擊十七年從都統賚塔敗海寇於蜈蚣山復長泰十八年遷灌口營參將十九年總督姚啓聖駐師漳浦令理分兵守高浦辭不赴劾

理虛兵冒饑坐奪官下部議罪擬杖徒理請剗海寇自贖上允之發軍前効力二十一年提督施琅征臺灣知理英勇奏署右營游擊領舟師部議格之特旨允行琅令理當前鋒諸弟瑤瑗珠皆從鄭克塽遣其將劉國軒守澎湖令曾遂等率衆數萬迎敵戰艦蔽海理督兵與戰自辰至午戰益力遂發礮彈掠理而過理仆遂遙呼曰藍理死矣瑤扶理起立理亦呼曰藍理在曾遂死矣呼刀族子法以授理見理腹破腸流出爲掬而納諸腹瑗傳以衣珠持匹練縛其創理呼殺賊麾兵進擊沉敵艦二敵大潰琅過理舟慰勞之令治創復戰琅舟膠淺沙敵艦環圍之理聞赴援理舟書姓名蓬上敵憚理戰爲稍卻追擊大敗之得敵艦請琅易舟出遂敵至西嶼殺傷殆盡遂克澎湖臺灣平敘功仍授參將加左都督未幾丁父憂二十六年服闋詣京師迎駕趙北口召至御前問澎湖戰狀命解衣視其創慰勞甚至超授陝西神木營副將尋擢宣化鎮總兵掛鎮朔將軍印二十九年移定海四十二年復移天津賜花翎冠服並御書榜曰所向無敵資焉四十三年以舊傷疾作乞解任溫旨慰留遣御醫診視理以畿輔地

多荒窪請於天津開墾水田百五十頃歲收稻穀民號曰藍田四十五年擢幅
建陸路提督四十六年上南巡理迎駕揚州賞賚有加復御書榜曰勇壯簡易
四十七年丁母憂命在任守制五十年巨盜陳五顯等糾二千人擾泉州永春
德化諸縣事聞逾數月理始疏陳並言村落安集如故上斥其誑命奪職總督
梁鼎巡撫滿保先後劾理貪婪酷虐諸狀遣侍郎和托彥騰燿會督撫按治得
實論斬詔從寬免死入京旗五十四年師北征剿策妄阿喇布坦理請赴軍前
効力賜總兵銜從都統穆爾賽協理北路軍務以病回京尋卒詔免所追銀兩
遣其妻子回籍歸葬理虜勇善戰性率直官福建提督政行於鄉里捕治盜賊
遂及諸豪家修橋梁平道路率富民錢益積怨泉州民繪虎爲榜列理諸累民
狀以是得罪上念其舊功終矜全之弟瑤未仕瑗官至金門總兵珠累官參將
黃梧字君宜福建平和人初爲鄭成功總兵守海澄順治十三年梧斬成功將
華棟等以海澄降大將軍鄭親王世子濟度以聞封海澄公十四年總督李率
泰疏請益梧兵合四千人駐漳州梧與李率泰及提督馬得功都統耶養水陸

分道進破七城克閩安鎮敕功賜甲冑貂裘加太子太保梧陳李率泰薦委署都督施琅智勇忠誠熟諳沿海事狀假以事權必能剪除海孽又言成功全藉內地接濟木植絲綿油麻釘鐵柴米土穴陰爲轉輸齋糧養寇請嚴禁並條列滅賊五策復請速誅成功父芝龍率泰先後上聞琅得擢用芝龍亦誅尋命嚴海禁絕接濟移兵分駐海濱阻成功兵登岸增戰艦習水戰皆用梧議也及成功病卒其將萬義萬祿楊學臬陳麟陳立勳黃昌黃義余期英等詣梧降康熙二年師攻廈門靖南王耿繼茂出溇尾梧偕李率泰出嵩嶼督水陸將卒夾擊斬獲無算遂克廈門金門浯嶼三島鄭錦遁據銅山繼茂令梧統兵駐雲霄防剿三年梧招錦將周全斌陳昇黃廷何政許貞李思忠等來降遂偕繼茂李率泰及提督王進功乘夜渡海拔銅山錦走還臺灣梧疏言自海上歸誠十二年中先後招撫文武吏二百餘兵數萬人有蒙賜封侯伯且世襲者臣公爵未定何等及承襲次數乞敕部覈議尋命定封一等公世襲十二次七年兵部議裁汰諸行省兵額梧標下額定官三十員兵一千二百人餘移駐河南十三年耿

精忠反傳檄至漳州梧方病疽聞變驚恚遂卒子芳度字壽巖梧既卒陽以梧命答精忠而陰募兵自守凡二月餘得壯士六千人遂斬精忠所置都督劉豹等督師登陴以蠟丸函疏遣黃藍開道馳奏上嘉梧忠蓋降詔優卹以芳度襲爵並諭師自浙江江西廣東三路入福建芳度詞何路兵先到迎會合剿尋疏言漳州介耿鄭二逆間自八月以來堅與耿拒偽與鄭和因得陰行招募練成勁旅萬人分布漳城及龍溪等五縣無何耿逆來犯臣率衆迎擊擒斬無算二逆構怨已深勢必俱敗誠得粵省大兵乘勝進攻臣當率師迎會迅奏掃除之功十四年復言臣拒耿弼鄭固守一載有餘近二逆通好臣謀已洩鄭逆遂撤回各鎮蠡聚海澄備糧繕器臣知其狡謀遣總兵楊壯猷等扼守平和並令臣從兄芳泰突圍赴廣東接引大兵鄭逆率衆圍城晝夜攻擊臣連次出兵斬其將黃鼎新盧英等但孤城缺餓百計難支計粵路援師旦夕可至乞密敕浙江江西兩路兵迅速進發俾二逆不能相顧臣可會合奏功漳州自五月被圍至七月敵來益衆豎雲梯攻城礮毀城堞三十餘丈芳度率將士拒戰殲賊無算

敵環攻不退芳度連疏告急詔趣統兵諸將迅速赴援並撥餉接濟十月城中糧盡叛將吳淑引賊陷城芳度率兵巷戰力竭赴開元寺井死年二十有五賊戕其尸母趙妻李自經從父樞從兄芳名弟芳聲芳祐並死期功男女從死者三十餘人賊又斫梧棺毀其尸副將蔡隆游擊朱武外委張瓊戴鄰陳謙俱罵賊死事聞優詔褒卹贈芳度王爵諡忠勇如多羅郡王例遣大臣致祭隆武瓊鄰謙俱贈官有差梧兄子芳世字周士先於康熙元年齋梧疏入覲留京師授一等侍衛及芳度遣藍齋疏告急芳世自陳乞從大軍自廣東進援上許之以爲福建隨征總兵官降敕褒勉世芳至廣東會弟芳泰自漳州突圍出芳世督兵赴援距漳州僅二日聞城陷退屯惠州芳度殉難詔以芳世襲爵十五年叛將馬雄等誘芳世兄弟附三桂不從乘間脫走至江西信豐遣藍齋疏陳陷賊始末上嘉之加太子太保命仍鎮守漳州藍自參將擢海澄總兵令馳赴康親王軍侯漳泉恢復收集海澄公部下散失官兵鎮守汛地十六年芳世疏言臣叔梧遺骸遭賊殘毀請與芳度一體議卹臣叔樞罵賊而死臣弟芳名芳聲舊

力守城同日遇害並乞賜卹詔贈梧太保諡忠恪樞贈按察使僉事芳名芳聲
贈太常寺卿各予蔭賜芳世蟒袍弓矢鞍馬褒嘉甚至十七年錦將劉國軒吳
淑犯海澄芳世與總督郎廷相副都統孟安等迭敗之觀音山秬山石頭石瑪村
等處國軒退犯漳州芳世率兵堵剿殲賊甚衆山寇蔡寅詐稱朱三太子糾衆
數萬與錦通犯漳州芳世擊敗之於天寶山斬其渠楊寧等芳世疏言漳州亂
後臣叔梧弟芳度舊部離散臣漸次收集得四千八百人選補本標五營六百
人餘無額可補乞汰留三千人別立三營視經制給餼部議從之未幾病卒遺
疏言閩省久困兵禍漳州尤甚願大帥底定後嚴飭有司輕徭薄賦甦此殘黎
並區畫海疆數事復以子溥年纔九歲請以弟芳泰襲爵詔贈少保諡忠襄芳
泰字和士少爲諸生佐芳度守漳州突圍出乞援城陷後父母妻子皆遇害至
廣東值尙之信叛芳泰與芳世從巡撫楊熙力戰得出尋授江南京口總兵芳
世卒襲爵屢出剿賊復平和漳平諸縣總督姚啓聖疏言芳泰年少不能轄標
兵下部議令芳泰詣京師芳泰疏請暫駐汀州爲兄芳度營葬啟聖復言海澄

公標下舊兵聞芳泰在汀州皆走依之僞將吳淑兄弟以曾害芳度不敢來降請敕芳泰速離福建十八年芳泰至京師上言臣久經行陣不爲幼弱離漳已十月不聞吳淑投誠督臣無計辦賊以臣藉口臣當壯年乞仍駐閩疆督剿以報主恩上慰諭之二十二年許其回籍營葬二十九年卒以子應纘爲芳度後襲爵四十九年應纘爲芳泰請卹贈太子少保乾隆初迫盜襲愾三十二年高宗特詔以公爵世襲罔替應纘卒諡溫簡無子以從子仕簡爲後襲爵乾隆初朝京師高宗以其幼令還里待命十九年授衢州總兵二十四年遷湖廣提督歷廣東福建陸路水師疏發廈門商船陋規上嘉之諭汝知恩朕亦知人漳泉民流入臺灣屢出劫掠仕簡親渡海督兵捕治再入覲賜黃馬褂雙眼花翎黑狐端罩病後偶躓賜人參高麗清心丸淡水生番戕同知楊凱復渡海督兵捕治加太子太保林爽文亂起督兵討之師久無功總督常青李侍堯先後劾仕簡貽誤奪官逮下刑部論斬特宥之尋赦歸卒仕簡子秉滔前卒以其孫嘉謨襲爵秉滔初授藍翎侍衛累遷至狼山總兵嘉謨初授頭等侍衛累遷至溫州

總兵

穆赫林博爾濟吉特氏滿洲正藍旗人祖瑣諾木爲兀魯特貝勒太祖時從明安來歸積戰閱授二等總兵官卒順治間追諡順良再傳子僧格襲世職遇恩詔累進三等伯卒穆赫林襲職康熙五年授正藍旗滿洲副都統列議政大臣吳三桂反十三年偕都統拉哈達率兵駐防兗州旋命移駐江寧時耿精忠叛應三桂大將軍康親王傑書將軍貝子傅喇塔討之穆赫林率所部喀喇沁土默特兵赴浙江與傅喇塔師會十四年從攻台州精忠將林冲糾衆萬餘列十三寨拒戰穆赫林督兵攻拔其寨斬獲無算復仙居師自黃巖進精忠將曾養性偕叛將祖宏勳據溫州分水嶺迎戰穆赫林擊敗之上塘嶺得戰艦三十餘精忠將彭國明率衆五千瀕甌江列寨穆赫林率兵至寶帶橋奮擊斬級千餘盡獲其槍械旗幟遂薄江而陳賊來犯輒戰卻之溫州繞城爲濠屬甌江爲閘以蓄水師爭閘賊護甚力久未能薄城時康親王傑書駐金華檄傅喇塔與穆赫林速攻城穆赫林言必得大礮乃可克十五年上責王貝子等遷延師無功

王因劾穆赫林與副都統吉勒塔布提督段應舉等違令瞻顧狀命事平議罪八月康親王自衢州攻克仙霞關精忠降徙養性宏勳等至福州檄穆赫林移師福建駐守延平鄭錦使其將吳淑吳潛自邵武來攻穆赫林擊之浦塘隘口陣斬其將楊大任等乘勝復邵武汀州二府及所屬縣錦屢犯泉州復侵潮州穆赫林與副都統沃申總兵馬三奇等分兵赴之屢捷十七年錦犯海澄穆赫林與海澄公黃芳世率兵迎擊於灣腰樹戰失利退保海澄錦復糾衆環逼據高阜瞰城中礮石交下穆赫林與應舉協力固守糧盡身負重創未幾城陷乃與應舉自經死事平吏議穆赫林征溫州師無功守海澄聞援且至不能突圍出當奪官及世職籍其家上以穆赫林有戰功世職沒命其從子赫達色襲爵世宗時詔與應舉並入祀昭忠祠段應舉漢軍鎮藍旗人父思信明廣寧千總太祖取廣寧來降予世職備禦卒應舉襲從端重親王博洛討叛將姜瓖攻汾州及太谷克之復從貝勒屯齊征湖南屢有功累擢鎮藍旗漢軍梅勒額真進世職二等阿達哈哈番借鎮國將軍王國光赴廣東駐防潮州康熙三年剿叛

將蘇利於南唐鋪賊敗遁復碣石衛敘功進世職一等尋署山東提督十三年率兵赴杭州剿禦耿精忠授福建提督擊賊仙居黃巖太平樂清進圍溫州皆捷十五年從康親王征福建精忠降時鄭錦據漳泉興化與將軍拉哈達合兵進剿復興化泉州二城復分兵定漳州及海澄等縣應舉進駐海澄十七年劉國軒吳淑等陷平和穆赫林戰失利詔資應舉不能平賊調江寧提督楊捷代之應舉仍以副都統從征尋城陷死之

論曰鄭氏爲海疆患三十餘年捷正色扞衛艱難內定泉漳外收金廈英理遂佐施琅越海恢疆而理尤忠奮稱虎將方鄭氏亂時有自海上降者輒優以封爵林興珠爲建義侯鄭鴻達爲奉化伯周全斌爲承恩伯鄭續緒爲慕恩伯梧最先降授成功舊封子芳世殉漳州以忠延世穆赫林等死海澄孤城抗節亦自有足稱者悍寇死戰禦之艱克之尤偉矣

清史稿

列傳四十九

魏裔介

熊賜履

李光地

魏裔介字石生直隸柏鄉人順治三年進士選庶吉士四年授工科給事中五年疏請舉經筵及時講學以隆治本又言燕趙之民椎牛裹糧首先歸命此漢高之關中光武之河內也今天下初定屢奉詔蠲賦而畿輔未霑實惠宜切責奉行之吏彰信於民俱報聞轉吏科以母憂歸服闋九年起故官應詔疏言上下之情未通滿漢之氣中闕大臣闕茸以保富貴小臣鉗結以習功名紀綱日弛法度日壞請時御正殿召對羣臣虛心諮訪令部院科道等官面奏政事仍令史官記注以求救時之實時世祖親政裔介疏言督撫重臣宜慎選擇不宜專用遼左舊人又言攝政王時隱匿逃人立法太嚴天下鬱然喪其樂生之心後以言官陳說始寬其禁責成州縣法至善也若舍此之外別有峻法竊恐下拂人心上干天和非尋常政治小小得失而已上聽之河南巡撫吳景道授恩

詔薦舉明兵部尙書張縉彥裔介疏言縉彥仕明身任中樞養寇誤國有盧杞賈似道之奸而庸劣過之宜予擯棄以協公論疏下部議以事在赦前予外用又疏言州縣遇災荒既經報部其例得蠲緩錢糧卽予停徵以杜吏胥欺隱並就州縣積穀及存貯庫銀先行振貸下所司議行時直隸河南山東諸省災別疏請振上命發帑金二十四萬分遣大臣振之全活甚衆十一年遷兵科都給事中東南兵事未定疏言今日劉文秀復起於川南孫可望竊據於貴筑李定國伺隙於西粵張名振流氛於海島連年征討尙稽天誅爲目前進取計蜀爲滇黔門戶蜀旣守而滇黔之勢蹙故蜀不可不先取此西南之情形也粵西稍弱昨歲桂林之役未大創必圖再犯以牽制我湖南之師宜令藩鎮更番迭出相機戰守此三方者攻瑕宜先粵西粵西潰則可望膽落滇黔亦當瓦解又疏劾湖南將軍續順公沈永忠擁兵觀望致總兵官徐勇辰常道劉昇祚力竭戰死永忠坐罷任奪爵復劾福建提督楊名高玩寇致漳州郡縣爲鄭成功淪陷名高坐罷任尋遷太常寺少卿擢左副都御史十三年疏劾大學士陳之遴營

私植黨之邊坐解官發遼陽開住十四年遷左都御史上諭之曰朕擢用汝非
繇人薦達裔介益感奮盡所欲言四月因欽天監推算次月日月交食疏請廣
言路緩工作寬州縣考成速頒恩赦釋滯獄酌復五品以下官俸減徵調之兵
節供應之費上嘉之下部詳議以行管侍經筵講漢文帝春和之詔因舉仁政
所宜先者數事正陽門外菜園爲前朝嘉蔬圃地久爲民居部議入官裔介過
其地民走訴即入告仍以予民十六年加太子太保十七年京察自陳以御史
巡方屢坐貪敗責裔介未糾劾削太子太保供職如故時可望猶據貴州鄭成
功亂未已裔介疏言可望恃同蠻爲助宜命在事諸臣加意招徠予以新敕印
舊者毋卽收繳則歸我者必多成功作亂海上我水師無多惟於沿海要地增
兵築堡使不得泊岸劫掠然後招其携貳散其黨與海患可以漸平下部議行
未幾疏劾大學士劉正宗成克鞏欺罔附和諸罪命正宗克鞏回奏未得質下
法司勘訊並解裔介官與質讞定正宗獲罪籍沒克鞏奪職視事復裔介官時
以雲南福建用兵加派錢糧裔介疏請救戶部綜計軍需足用卽停止上命未

派者並停止康熙元年雲南既定疏言雲南既有吳三桂藩兵數萬及督提兩標兵則滿洲兵可撤但滇黔川楚邊方遼遠不以滿洲兵鎮守要地倘戎寇生心恐鞭長莫及荆襄乃天下腹心宜擇大將領滿兵數千駐防無事則控制形勢可以銷姦宄之萌有事則提兵應援可以據水陸之勝疏下部格不行復請以湖廣總督移駐荊州從之進吏部尙書三年拜保和殿大學士時輔臣柄政論事輒爭執裔介調和異同時有所匡正預修世宗實錄充總裁官九年典會試是年內院承旨會吏禮二部選新進士六十人試以文字擬上中下三等入奏上親定二十七人爲庶吉士御史李之芳劾裔介所擬上卷二十四人先使人通信招權納賄並謂與班布爾善相比引用私人班布爾善官大學士黨濫拜伏法上命裔介復奏裔介疏辨并言臣與班布爾善同官論事輒齟齬以微拜之勢讎足跡不至其門豈肯附班布爾善臣服官以來彈劾無所避忌前劾劉正宗其黨切齒於臣者十年於茲之芳正宗同鄉今爲報復因自請罷斥疏下吏部會質之芳力爭裔介自引咎部議以之芳劾奏有因裔介應劓秩罰俸

上寬之命供職如故十年以老病乞休詔許解官回籍世祖實錄成進太子太傅二十五年卒賜祭葬如制裔介居言路最久疏至百餘上數陳剴切多見施行生平篤誠信程朱之學以見知聞知述聖學之統著述凡百餘卷大指原本儒先並及經世之學家居十六年躬課稼穡循行阡陌人不知其爲故相也雍正間祀賢良祠乾隆元年追諡文毅

熊賜履字敬修湖北孝感人順治十五年進士選庶吉士授檢討典順天鄉試遷國子監司業進弘文院侍讀康熙六年聖祖詔求直言時輔臣趨拜專政賜履上疏幾萬言略謂民生困苦孔亟私派倍於官徵雜項浮於正額一旦水旱頻仍蠲豁則吏收其實而民受其名振濟則官增其肥而民重其瘠然非獨守令之過也上之有監司又上之有督撫朝廷方責守令以廉而上官實縱之以貪方授守令以養民之職而上官實課以厲民之行故督撫廉則監司廉守令亦不得不廉督撫貪則監司貪守令亦不得不貪此又理勢之必然者也伏乞甄別督撫以民生苦樂爲守令之賢否以守令貪廉爲督撫之優劣督撫得人

守令亦得人矣雖然內臣者外臣之表也本原之地則在朝廷其大者尤在立綱陳紀用人行政之間今朝廷之可議者不止一端擇其重且大者言之一曰政事極其紛更而國體因之日傷也國家章程法度不聞略加整頓而急功喜事之人又從而意爲更變但知趨目前尺寸之利以便其私而不知無窮之患已潛滋暗伏於其中乞敕議政王等詳議制度參酌古今勒爲會典則上有道揆下有法守矣一曰職業極其隳窳而士氣因之日靡也部院臣工大率緘默瞻顧外託老成慎重之名內懷恃祿養身之念憂憤者謂之疏狂任事者目爲躁競廉靜者斥爲矯激端方者詆爲迂腐聞有讀書窮理之士則羣指爲道學誹笑詆排欲禁錮其終身而後已乞申飭滿漢諸臣虛衷酌理實心任事化情面爲肝膽轉推諉爲擔當漢官勿阿附滿官堂官勿偏任司員宰執盡心獻納勿以唯諾爲休容臺諫極力糾繩勿以鉗結爲將順則職業修舉官箴日肅而士氣日奮矣一曰學校極其廢弛而文教因之日衰也今庠序之教缺焉不講師道不立經訓不明士子惟揣摩舉業爲弋科名掇富貴之具不知讀書講學

求聖賢理道之歸高明者或汎濫於百家沈淪於二氏斯道淪晦未有甚於此時者也乞責成學院學道統率士子講明正學特簡儒臣使司成均則道術以明教化大行人才日出矣一曰風俗極其僭濫而禮制因之日壞也今一裘而費中人之產一宴而糜終歲之糧輿隸被貴介之服倡優擬命婦之飾習爲固然夫風俗奢禮制壞爲飢寒之本原盜賊訟獄凶荒所由起也乞明詔內外臣民一以儉約爲尙自王公以及士庶凡宮室車馬衣服規定經制不許逾越則貧風自息民俗漸醇矣雖然猶非本計也根本切要端在皇上皇上生長深宮春秋方富正宜慎選左右輔導聖躬薰陶德性優以保衡之任隆以師傅之禮又妙選天下英俊使之陪侍法從朝夕獻納毋徒事講幄之虛文毋徒應經筵之故事毋以寒暑有輟毋以晨夕有間於是考諸六經之文監於歷代之迹實體諸身心以爲敷政出治之本若夫左右近習必端其選綴衣虎賁亦擇其人佞倖不置於前聲色不御於側非聖之書不讀無益之事不爲內而深宮燕閑之間外而大廷廣衆之地微而起居言動之恒凡所以維持此身者無不備防

閑此心者無不周主德清明君身強固由是直接二帝三王之心法自足措斯世於唐虞三代之盛又何吏治之不清民生之不遂哉疏入劄拜惡之請治以妄言罪上勿許七年遷秘書院侍讀學士疏言朝政積習未除國計隱憂可慮年來災異頻仍饑荒疊見正宵旰憂勤徹縣減膳之日講學勤政在今日最爲切要乞時御便殿接見羣臣講求政治行之以誠持之以敬庶幾轉咎徵爲休徵疏入劄拜傳旨詰問積習隱憂實事以所陳無據妄奏沽名下吏譏鑄二秩上原之八年劄拜敗命康親王傑書等勸治以劄拜銜賜履意圖傾害爲罪狀之一方劄拜輔政擅威福大臣稍與異同立加誅戮賜履以詞臣論事侃侃無所避用是著直聲上即位後未舉經筵賜履特具疏請之並請設起居注官上欲幸塞外以賜履疏諫乃寢且嘉其直九年擢國史院學士未幾復內閣設翰林院更以爲掌院學士舉經筵以賜履爲講官日進講弘德殿賜履上陳道德下達民隱上每虛己以聽十四年諭獎其才能清慎遷內閣學士尋超授武英殿大學士兼刑部尙書十五年陝西總督哈占疏報獲盜開復疏防官下內閣

賜履誤票三法司核擬既檢舉得旨免究賜履改草簽欲誘脅同官杜立德又取原草簽嚼而毀之立德以語索額圖事上聞吏部議賜履票擬錯誤欲誘脅同官杜立德改寫草簽復私取嚼毀失大臣體坐奪官歸僑居江甯二十三年上南巡賜履迎謁召入對御書經義齋榜以賜二十七年起禮部尙書未幾以母憂去二十八年上復南巡賞賚有加二十九年起故官仍直經筵命往江南獄獄調吏部會河督靳輔請豁近河所占民田額賦命賜履會勘奏免高郵山陽等州縣額賦三千七百二十八頃有奇三十四年弟編修賜瓚以奏對欺飾下獄御史甄翔麟遂劾吏部銓除州縣以意高下賜履僞學欺罔乞嚴譴下都察院議賜履與尙書庫勒納侍郎趙士麟彭孫適當降官上不問賜瓚亦獲赦三十八年授東閣大學士兼吏部尙書預修聖訓實錄方略明史並充總裁官典會試者五以年老累疏乞休四十二年溫旨許解機務仍食俸留京備顧問四十五年乞歸江甯比行召入講論累日賜履因奏巡幸所至官民供張煩費惟上留意上額之給傳遣官護歸四十六年上閱河幸江甯召見慰問賜御用

冠服四十八年卒年七十五命禮部遣官視喪賜賻金千兩贈太子太保諡文端五十一年上追念賜履知其貧迭命江南織造周恤其家諭吏部召其二子志契志夔詣京師皆尙幼復諭賜履僚屬門生釀金飲之賜履論學以默識篤行爲旨其言曰聖賢之道不外乎庸庸乃所以爲神也著閑道錄嘗進上命備省覽雍正間祀賢良祠

李光地字晉卿福建安溪人幼穎異年十三舉家陷山賊中得脫歸力學慕古順治九年成進士選庶吉士授編修十二年乞省親歸十三年耿精忠反鄭錦據泉州光地奉親匿山谷間錦與精忠並遣人招之力拒十四年密疏言閩疆褊小自二賊割據誅求敲扑民力已盡賊勢亦窮南來大兵宜急攻不可假以歲月恐生他變方今精忠悉力於仙霞杉關鄭錦并命於漳潮之界惟汀州小路與贛州接壤賊所置守禦不過千百疲卒竊聞大兵南來皆於賊兵多處鏖戰而不知出奇以搗其虛此計之失也宜因賊防之疏選精兵萬人或五六千人詐爲入廣由贛達汀爲程七八日耳二賊聞急趨救非月餘不至則我軍入

閩久矣賊方悉兵外拒內地空虛大軍果從汀州小路橫貫其腹則三路之賊不戰自潰伏乞密敕領兵官偵探虛實隨機進取仍恐小路崎嶇須使鄉兵在大軍之前步兵又在馬兵之前庶幾萬全可以必務置疏蠟丸中遣使間道赴京師因內閣學士富鴻基上之上得疏勦容嘉其忠下兵部錄付領兵大臣時尙之信亦叛師次贛州南安未能入福建康親王傑書自衢州克仙霞關復建甯延平精忠請降師進駐福州令都統拉哈達賚塔等討鄭錦並求光地所在十六年復泉州光地謁拉哈達於漳州拉哈達白王疏稱光地矢志爲國顛沛不渝宜予褒揚命優敘擢侍讀學士行至福州以父喪歸十七年同安賊蔡寅結衆萬餘以白巾爲號掠安溪光地募鄉勇百餘人扼守絕其糧道賊解去未幾錦遣其將劉國軒陷海澄漳平同安惠安諸縣進逼泉州斷萬安江東二橋南北援絕光地道使赴拉哈達軍告急值江水漲道阻乃導軍自漳平安谿小道入光地從父日焜率鄉勇度石珠嶺芟荆棘架浮橋以濟光地出迎具牛酒犒軍又使弟光垵光垠以鄉兵千度白鶴嶺迎巡撫吳興祚軍於永春師次泉

州擊破國軒竄入海拉哈達上其功再予優敘遷翰林學士光地上疏推功將帥辭新命不允並官日焜後積功官至永州總兵十九年光地至京師授內閣學士入對言鄭錦已死子克塽幼弱部下爭權宜急取之且舉內大臣施琅習海上形勢知兵可重任上用其言卒平臺灣陳夢雷者侯官人與光地同歲舉進士同官編修方家居精忠亂作光地使日焜潛詣夢雷探消息得虛實約並具疏密陳破賊狀光地獨上之由是大受寵眷及精忠敗夢雷以附逆逮京師下獄論斬光地乃疏陳兩次密約狀夢雷得減死戍奉天二十一年乞假奉母歸二十五年還京授翰林院掌院學士直經筵兼充日講起居注官教習庶吉士逾年以母病乞歸省二十七年至京初光地與侍讀學士德格勒善於上前互相稱引上召德格勒與諸詞臣試乾清宮以文字劣鐫秩旋掌院庫勒訥劾其私抹起居注事下獄論罪詔責光地光地引罪乞嚴譴上原之尋擢兵部侍郎三十年典會試借侍郎博齊徐廷樞原任河督靳輔勘視河工三十三年督順天學政聞母喪命在任守制光地乞假九月回里治喪御史沈懋曾楊敬儒

交章論劾上令遵初命給事中彭鵬復疏論光地十不可留目爲貪位忘親排
詆尤力乃下九卿議命光地解任在京守制三十五年服闋仍督順天學政三
十六年授工部侍郎三十七年出爲直隸巡撫初畿輔屢遭水患上以漳河與
滹沱合流易汎濫命光地導漳自故道引入運河殺滹沱之勢光地疏言漳河
見分爲三一自廣平經魏元城至山東館陶入衡水歸運一爲老漳河自山東
邱縣經南宮諸縣與完固口合流至鮑家嘴歸運一爲小漳河自邱縣經廣宗
鉅鹿合於滏又經束鹿冀州合於滹沱由衡水出獻縣完固口復分爲兩支小
支與老漳河合流而歸運大支經河間大城靜海入子牙河而歸淀今入衛之
河與老漳河流淺而弱宜疏濬其完固口小支應築壩逼水入河更於靜海閘
留二莊挑土築隄束水歸淀俾無汎濫詔報可尋奏霸州永清宛平良鄉固安
高陽獻縣因濬新河占民田一百二十九頃請豁免賦額從之通州等六州縣
額設紅剝船六百號剝運南漕每船給贍田遇水旱例不蠲免光地奏請援民
田例概蠲免之三十九年上臨視子牙河工命光地於獻縣東西兩岸築長隄

西接大城東接靜海亘二百餘里又於靜海廣福樓焦家口開新河引水入淀由是下流益暢無水患四十二年上褒其治績擢吏部尚書仍管巡撫事四十二年給事中黃鼎楫湯右曾許志進宋駿業王原等合疏劾光地撫綏無狀致河間饑民流入京畿並留津縣墮災不報狀光地疏辨引咎乞罷詔原之再疏辭尚書不許尋疏劾雲南布政使張霖假稱詔旨販鬻私鹽得銀百六十餘萬霖論斬籍沒四十四年拜文淵閣大學士時上潛心理學旁闡六藝御纂朱子全書及周易折中性理精義諸書皆命光地校理日召入便殿擊求探討四十七年皇太子允礽以疾廢命諸大臣保奏諸皇子孰可當儲位者尚書王鴻緒等舉皇子允禩上切責之詢光地何無一言光地奏前者皇上問臣以廢太子病臣奏言徐徐調治天下之福臣未嘗告諸人也光地被上遇同列多忌之者凡所稱薦多見排擠因以撼光地撫直隸時御史呂履恒劾光地於秋審事任意斷決上察其不實還其奏給事中王原劾文選郎中陳汝弼受贓法司論絞汝弼光地所薦也上察其供證非實下廷臣確核得逼供行賄狀汝弼免罪承